


江南通志

自卷百三十八  
至卷百四十

內閣文庫			
函	冊	號	類
二	二	九	漢書
四	六	三	

內閣文庫			
函	冊	號	類
二	二	九	漢書
四	六	三	
(一三二一)			

內閣文庫			
番號	漢	3969	
冊數	692 (121)		
函號	291	97	



江南通志卷一百三十八

人物志

淺草文庫

內閣

選舉詳而後人物顯江南自春秋時季札子游產於吳老聃管仲出潁亳之間風氣肇開矣漢後千八百年道德政事文章之徒麟麟郁郁著於華夏至我

朝而彌盛雖天地所旋斡山川所毓孕亦乘乎其時也

國家教養垂百年所培長而搜擇之者有加靡已賢士大

夫以勲德忠孝儒雅文學稱者皆克踐其聲以揚於世

婦女亦厲其名節無愧於旌典錄古及今詳且慎焉為

類十有二為卷五十有二作人物志第八

名賢

商巫咸太戊時相周書君奭篇巫咸又王家傳有咸又四篇咸子賢書曰在祖乙時則有若巫賢有墓宅在虞山周蹇叔銍人秦繆公與百里傒語大說授之國政傒讓曰臣不及臣友蹇叔公使人厚幣迎叔以爲上大夫季札吳子壽夢季子有三兄諸樊餘祭餘昧壽夢賢季札欲立之札辭乃立諸樊及諸樊旣除喪復讓札札棄其室而耕乃舍之諸樊卒命授弟餘祭欲傳以次必致國於札札卒不受封於延陵號延陵季子李耳苦縣人字伯陽諡曰聃周柱下史孔子往問禮老子聃曰良賈深藏若虛君子盛德容貌若愚孔子退曰老子其猶龍乎所著有道德經五千餘言

言偃字子游吳人孔門高弟嘗爲武城宰唐開元中定十哲從祀贈吳侯宋祥符中封丹陽公改封吳國國朝康熙五十一年

賜裔孫德堅五經博士世襲

漢文翁名黨字仲翁廬江舒人爲蜀郡守見蜀地僻陋欲誘進之乃選郡縣小吏開敏有材者張叔等十餘人遣詣京師受業博士歸以爲右職察舉有至郡守刺史者又修起學官招下縣子弟爲學弟子爲除更繇高者以補郡縣吏次爲孝弟力田每出行縣選諸生明經飭行者與俱使傳教令吏民見而榮之爭欲爲學官弟子由是蜀地文學比齊魯焉至武帝時令天下郡國皆立學

自文翁爲之始  
劉向字子政彭城人楚元王四世孫宣帝講論五經於石渠拜郎中元帝時官宗正給事中外戚許史宦官恭顯譖之謫廢十餘年成帝時復進用會王鳳兄弟秉政向集洪範五行傳論奏之帝雖心知向忠爲王氏所持終不得大用嘗序次列女傳著說苑新序數上封事帝每嘉歎之

范滂字孟博汝南細陽人少勵清節舉孝廉冀州盜起以滂爲清詔使登車攬轡慨然有澄清天下之志至州境守令賊汙者望風解印綬去其所舉奏莫不厭塞衆議旣而署郡功曹嚴整疾惡顯薦異節拙拔幽陋後坐

鈎黨繫獄獄吏謂當祭臯陶滂曰臯陶古之直臣知滂無罪將理之于帝如其有罪祭之何益尋得釋建寧二年大捕黨人詔書至卽自詣獄

三國張昭字子布彭城人爲孫策長史文武事悉委之後以弟權託昭昭率羣臣立而輔之拜輔吳將軍封婁侯性剛好直諫權嘗不能堪案刀而怒昭更流涕出語權亦泣下嘗曰孤與張公言不敢妄也舉邦憚之卒諡文顧雍字元歎吳人孫權爲會稽太守不之郡以雍爲丞行太守事吏民歸服權爲吳王領尚書令封陽遂鄉侯拜侯還寺而家人不知迎母於吳及至權臨賀之親拜其母於庭雍爲人寡言語舉動時當權嘗歎曰顧君不

言言必有中代孫邵爲丞相選用文武各隨其能心無  
適莫赤烏中卒諡肅侯

**宋**范仲淹字希文吳縣人二歲而孤少有志操旣長依戚  
同文學晝夜不息舉進士第爲廣德軍司理參軍遷大  
理寺丞監楚州糧料院母喪去官晏殊知應天府召賓  
府學薦爲祕閣校理仲淹汎通六經長於易學者多從  
質問爲執經講解無所倦嘗推其奉以食四方遊士諸  
子易衣而出晏如也每敢激論天下事奮不顧身一時  
士大夫矯勵尚風節自仲淹倡之天聖七年上疏請太  
后還政不報通判陳州召爲右司諫歲大旱蝗命仲淹  
安撫江淮所至開倉振乏且條上救敝十事知蘇州州

大水民田不得耕仲淹疏五河導太湖注之海拜天章  
閣待制元昊反知永興軍會夏竦爲陝西經畧安撫招  
討使進仲淹龍圖閣直學士以副之兼知延州大閱州  
兵分部教之量賊衆寡使更出禦賊城青澗以據賊衝  
大興營田爲持久計修承平永平等砦定堡障通斥候  
遷環慶路經畧安撫緣邊招討使以詔書犒賞諸羌閱  
其人馬爲立條約諸羌受命始爲漢用築大順城而白  
豹金湯皆不敢犯環慶自此寇益少帝復置陝西路安  
撫經畧招討使以仲淹韓琦龐籍分領之仲淹爲將號  
令明白愛撫士卒諸羌來者推心接之不疑故賊亦不  
敢輒犯其境元昊請和召拜樞密副使除參知政事帝

再賜手詔又爲之開天章閣召二府條對仲淹上十事  
 一曰明黜陟二曰抑僥倖三曰精貢舉四曰擇長官五  
 曰均公田六曰厚農桑七曰修武備八曰推恩信九曰  
 重命令十曰減徭役天子悉采用之初仲淹以忤呂夷  
 簡放逐者數年及夷簡罷召還倚以爲治中外想望其  
 功業而仲淹以天下爲己任日夜謀慮興致太平會邊  
 陲有警因與樞密副使富弼請行邊於是仲淹爲河  
 東陝西宣撫使賜黃金百兩悉分遺邊將又以爲資政  
 殿學士陝西四路宣撫使知邠州卒年六十四贈兵部  
 尚書諡文正既葬帝親書其碑曰褒賢之碑仲淹內剛  
 外和性至孝以母在時方貧其後雖貴非賓客不重肉

妻子衣食僅能自充而好施予置義莊里中以贍族人  
 汎愛樂義士多出其門下雖里巷之人皆能道其名字  
 爲政尚忠厚所至有恩邠慶二州之民與屬羗皆畫像  
 立生祠事之及其卒也羗酋數百人哭之如父齋三日  
 而去

國朝康熙五十二年配享文廟四子純祐純仁純禮純粹  
 包拯字希仁合肥人舉進士以親老不就州縣職後二  
 親繼歿廬墓終喪始入仕知端州端產硯拯歲滿不持  
 一硯歸尋拜監察御史後知諫院數論斥權倖大臣請  
 罷一切內降曲恩除龍圖閣直學士歷知開封府拯立  
 朝剛毅貴戚宦官斂手人以拯笑比黃河清語曰關節




不到有閻羅包老訟訴者徑造庭下前陳曲直吏不敢欺自三司使拜樞密副使卒諡孝肅  
胡瑗字翼之泰州人以經術教授吳中范仲淹薦瑗更定雅樂試校書郎教授湖州誨人有法立經義治事二齋倡明體達用之學慶曆中詔太學取其法著為令後為國子監直講其徒益眾庠舍不能容明嘉靖中從祀

文廟

呂公著字晦叔壽州人宰相夷簡子夷簡早器異之曰他日必為公輔登進士第通判潁州歐陽修與為講學友歷天章閣待制英宗初論御史呂誨等不當以爭濮議斥神宗時除御史中丞力論王安石新法之非語極

深切進同知樞密院事哲宗即位屢遷右僕射與司馬光同心輔政革弊便民天下懽呼鼓舞光薨獨當國除吏皆一時之選卒於位宣仁太后深悼惜之諡正獻  
范純仁字堯夫皇祐元年進士治平中為侍御史力爭濮王典禮當如從官議語斥大臣尤切出通判安州直聲震天下熙寧中知諫院論王安石變法度失人心前後論奏反復激切無所諱避復出補外元豐末召為給事中素與司馬光同志而臨事多矯正人益服其平直歷尚書右僕射務以博大開上意忠篤革士風章惇用事累貶永州徽宗立力辭召命請還潁昌里第卒諡忠宣純仁性夷易寬簡及義所在挺然不少屈自言平生



好學得之忠恕二字自爲布衣至宰相廉儉如一  
李綱字伯紀祖賡自邵武徙居無錫登政和二年進士  
以敢言著聲金將攻汴宰執議請暫避敵鋒綱力陳不  
可去曰六軍父母妻子皆在都城願以死守萬一中道  
散歸陛下孰與衛上感悟命輟行綱治守戰之具不數  
日而畢敵兵攻城綱身督戰斬酋長十餘人衆數千人  
金將引退求遣大臣至軍中議綱請行不聽姚平仲勇  
而寡謀率步騎夜斫敵營不克金使來詰遂罷綱太學  
生陳東等詣闕上書明綱無罪軍民不期而集者數十  
萬命綱復充京城四壁守禦使下命能殺敵者賞衆無  
不奮躍金人懼稍稍引却及退師除綱知樞密院事會

耿南仲忌綱以綱爲河東北宣撫使高宗卽位拜尚書  
右僕射綱疏陳十事因薦張所爲河北招撫使傅亮爲  
河東經制副使有詔欲幸東南綱極論其不可不報乞  
身歸田自綱罷張所以罪去傅亮以母病辭歸招撫經  
制二司皆廢車駕遂東幸兩河郡縣相繼淪陷凡綱所  
規畫軍民之政一切廢罷金進攻京東西入毀關輔而  
中原盜賊蠡起矣紹興十年薨贈少師綱負天下之望  
以一身用舍爲社稷生民安危雖身或不用用有不久  
而其忠誠義氣凜然動乎遐邇每宋使至燕山必問李  
綱趙鼎安否其爲遠人所畏服如此自號梁溪漫叟有  
梁溪集易傳內外篇等書




朱熹字元晦婺源人父松生熹於尤溪官舍幼與羣兒游獨以沙列八卦舉紹興十八年進士寧宗初歷煥章閣待制侍讀熹初從劉子羽居崇安後從延平李侗學得聖道之傳學者宗師之自絕學以來集諸儒之大成發先聖之祕蘊熹一人而已歿諡曰文追封徽國公從祀文廟

國朝康熙五十年

聖祖特旨升祔十哲之次

明李時勉名懋以字行上元人永樂中進士官侍讀洪熙時上疏觸忌諱上震怒縛至便殿命力士捶之幾死下獄宣宗即位恨時勉觸仁考怒將殺之已面鞠得其故

立脫桎梏復其官正統中遷國子祭酒王振惡其守正構陷之荷校國學門諸生石大用等上章乞以身代事得解致仕去卒諡忠文所著有古廉文集  
吳訥字敏德常熟人洪熙初侍臣以經明行修薦授御史出按浙江以維風紀植綱常為務繼按貴州恩威著遐夷宣德中歷官左副都御史正統六年請老歸卒諡文恪訥博覽羣籍議論有根柢於性理之奧多所發明所著書皆可傳於後  
莊昺字孔暘江浦人成化丙戌進士授檢討與同官章懋黃仲昭抗疏諫張燈忤旨廷杖謫桂陽州判官改南行人司副丁艱歸居定山聚徒講學垂三十年弘治中



召至京遷南驗封郎中逾年乞歸杲之學與陳獻章同趣超然自得於經書傳注之外學者稱定山先生諡文節

吳寬字原博長洲人成化壬辰舉禮部廷試皆第一授修撰侍孝宗於東宮每進講閑雅詳明弘治中歷遷禮部尚書議孝肅皇后並祔非禮宜祀別廟上悅而從之未及柄用而卒諡文定寬行履高潔不爲矯激而自守以正以文章德行負天下重望

王鏊字濟之吳縣人成化甲午鄉試明年會試俱第一廷試第三授編修弘治初遷侍講學士充講官時中貴李廣導帝遊西苑鏊講文王不敢盤于游田反覆規戒

帝爲動容屢遷禮部左侍郎正德初與韓文諸大臣請誅劉瑾等八奄上怒傳諭甚厲鏊奏對不撓歷拜文淵閣大學士瑾屢欲害文及劉健等鏊力救得免已而瑾益橫鏊遂三疏乞歸卒諡文恪鏊博學有識鑒文章爾雅論議明暢嘗著性善論一篇王守仁深推之


邵寶字國賢無錫人成化甲辰進士知許州有惠政月朔會諸生講明義利之辨歷江西提學副使教學者以致知力行爲本宸濠索題詠峻却之後以副都御史總督漕運忤劉瑾致仕瑾誅起撫貴州累擢南京禮部尚書乞終養歸卒諡文莊寶學以洛閩爲宗詩文典重和雅原本經術粹然一出於正有容春堂集定性書簡端

錄漕政舉要學者稱二泉先生容春堂集  
魏校字子才崑山人弘治乙丑進士歷官國子祭酒改  
太常少卿遷本寺卿致仕卒諡恭簡校幼有異質私淑  
胡居仁主敬之學而貫通諸儒之說折衷於六經醇如  
也貌朴訥簡重言動以禮學者稱莊渠先生

顧憲成字叔時無錫人萬曆庚辰進士歷驗封主事疏  
論計典語侵執政謫官累擢考功主事力爭三王並封  
并貽書首輔王錫爵事遂寢尋為選郎以推起舊輔王  
家屏忤旨削籍歸邑有東林書院為宋儒楊時講學所  
憲成及弟允成偕同郡高攀龍安希范劉元珍錢一本  
薛敷教葉茂才輩講學其中時號東林八君子憲成既

廢名益高學者稱涇陽先生一時清議倚以為重起南  
光祿少卿不就卒天啟中璫禍作追奪封誥懷宗初贈  
吏部侍郎諡端文有涇陽藏稿小心齋劄記大學通考  
還經錄

高攀龍字存之無錫人萬曆己丑進士授行人趙川賢  
等去位攀龍上疏論救語侵輔臣謫揭陽典史歸家居  
三十年天啟初起光祿丞累擢左都御史糾御史崔呈  
秀罷之時魏忠賢用事以崔呈秀為腹心以前憾矯詔  
削籍歸繼為織監李實誣劾逮問官旂未至曰大臣不  
可辱遂自沉於池懷宗初贈太子少保兵部尚書諡忠  
憲攀龍學本濂洛以靜為主涵養邃密學者稱景逸先



生著有周易孔義春秋正蒙註天完錄就正錄家訓諸書

國朝張英字敦復桐城縣人康熙丁未進士館選侍講幄敷陳經義民生吏治悉心獻納知無不言

聖祖初設南書房俾每日侍直以資講論詞臣賜第內城自此始及佐樞部掌邦禮恪慎清粹一時典章儀制

廟廷制誥之文多其手定洎登相位忠盡純誠佐佑啟沃歷任三十餘年未嘗一日離內直

聖祖稱其老成敬慎終始不渝有古大臣風嘗

命工寫像以賜生平多隱德外和內剛一私不染薦拔賢俊如不及從不使人知廣義田以贍宗族肅家範以率子弟

一門感勵名節溫恭謙謹稱江左第一家風學問醇博

所著有易書衷論及存誠堂篤素堂詩文集各若干卷

年七十二卒於家

御祭卹葬逾恒制諡曰文端

世宗御極之初有甘盤舊學之思贈太子太傅崇祀京城賢

良祠復

賜祭于本籍祭文有曰靖共爾位忠純克篤夫小心垂裕後昆

善慶彌彰夫厚德又

御書祠宇匾聯有忠純詒範師模如在之褒恩禮之渥罕有倫

比

趙申喬字慎旃武進人父繼鼎明季庚辰進士兵部主

事申喬康熙庚戌進士由商邱知縣擢刑部主事遷員外歷官至浙江巡撫改偏沅入為左都御史遷戶部尚書為人清介拔俗不可干以私令中州時錢穀獄訟不假手於幕客部民一見問姓名久而不忘撫浙時易海塘土以石祭江神海潮至竟工不逼岸在湖南禁私派重耗貪墨屏息為總憲不避嫌怨亦不務搏擊戶部勾稽出內惟慎九卿會議意有不可者輒別奏聞每蒙報可卒謚恭毅奉

旨欽賜入賢良祠雍正十二年又於本地專祠

賜祭一次祭文一道

江南通志卷一百三十八終

江南通志卷一百三十九

人物志

宦績 江寧一府

江寧府

晉紀瞻字思遠其先秣陵人吳平後徙歷陽瞻少以方直知名元帝為安東將軍引為軍諮祭酒帝即位拜侍中轉尚書上疏諫靜多所匡正明帝時徙領軍將軍瞻才兼文武忠亮雅正卒謚曰穆

薛兼字令長丹陽人祖綜吳尚書僕射父瑩仕晉為散騎常侍兼清素有器宇初入洛司空張華見而奇之元帝為安東將軍引為軍諮祭酒稍遷丞相長史甚勤其

事帝踐阼歷尚書領太子少傅自綜至兼三世傳東宮  
談者美之

張闔字敬緒丹陽人吳輔吳將軍昭曾孫同郡薛兼薦  
闔才幹於元帝引爲安東參軍甚加禮遇帝爲晉王累  
遷侍中帝踐阼出補晉陵內史在郡甚有威惠時所部  
四縣並以旱告闔立曲阿新豐塘溉田八百餘頃每歲  
豐稔歷大司農遷尚書蘇峻反闔入宮侍衛峻使闔持  
節權督東軍闔密宣太后詔令於三吳令速起義軍又  
運穀集兵以討峻峻平加散騎常侍後拜光祿大夫卒  
陶回丹陽人抗子有器幹王導引爲從事中郎蘇峻反  
回收合義旅與陶侃溫嶠共攻斬峻以功遷征虜將軍

吳興太守時歲饑穀貴回不待報開倉賑濟一境獲全  
旣而下詔并勅會稽吳郡依回賑恤二郡賴之卒諡威  
甘卓字季思丹陽人元帝初渡江授卓揚威將軍歷陽  
內史討周馥及杜弢屢立戰功歷安南將軍梁州刺史  
假節督沔北諸軍鎮襄陽爲政簡惠善於撫綏估稅悉  
除市無二價西土稱之

王劭字敬倫導第五子美姿容有風操雖家人近習未  
嘗見其情替之容官至吏部尚書尚書僕射出爲吳國  
內史弟蒼字敬文亦爲吳國內史值年饑粟貴蒼以私  
米作餽粥以飼餓者所濟活甚衆

王珣字元琳導次子中書令洽之子爲桓溫掾軍中機

務悉委珣文武數萬人悉識其面從討袁真封東亭侯  
歷吳國內史士庶悅服徵爲僕射領吏部後進衛將軍  
都督琅邪水陸軍事以疾解職弟珉字季琰少有才藝  
名出珣右代王獻之爲中書令世謂獻之大令琰小令  
卒年二十八

王允之字深猷導族子父舒爲荊州刺史王敦敗王含  
父子俱奔舒舒逆而沉之於江蘇峻反舒遣允之率義  
軍累破之以功封舒彭澤縣侯卒諡穆允之咸康中刺  
江州莅政甚有威惠繼爲衛將軍會稽內史未到卒諡  
曰忠

王彪之字叔武尚書僕射庾之子除著作佐郎歷遷侍

中廷尉言郊祀必赦恐凶愚生心僥倖從之轉吏部尚  
書郎遷轉不阿出爲會稽內史居郡八年豪右斂跡流  
亡盡復海西廢時彪之神彩毅然文武儀準莫不取定  
朝廷服之遷尚書令與謝安並掌朝政大事必從彪之  
諮議而定卒諡簡

王述字懷祖父承從元帝渡江司徒王導以門第辟述  
中兵屬嘗見導每發言一座莫不贊美述正色曰人非  
堯舜何能每事盡善導改容謝之歷庾冰征虜長史冰  
欲移鎮樂鄉述止之尋遷衛將軍尚書令桓溫平洛陽  
議欲遷都朝廷憂懼述曰溫以虛聲威朝廷耳但從之  
自無所應果不行又議欲遷鐘簋述曰方當蕩平區宇

旋軫舊京若其不爾宜改遷園陵不應先事鐘簋温無以奪以老乞歸卒謚簡

王坦之字文度述子也襲父爵領左衛將軍非時俗放蕩著廢莊論以敦儒術尋領木州大中正簡文帝詔桓温依周公居攝故事坦之持詔入帝前毀之乃使坦之改詔俄領丹楊尹徐兗二州刺史鎮廣陵上表言人君以孝敬為本以委任為貴又諫謝安好聲律葺功不廢絲竹之非卒年四十六臨終與謝安桓冲書惟憂國家之計謚曰獻

南北朝齊劉係宗丹陽人官右軍將軍兼中書通事舍人再為少府久在朝省嫻於職事齊武帝盛稱其有經濟

才

梁周捨建康人梁初拜尚書祠部郎禮儀損益多自捨出累遷吏部郎預機密後與徐勉同叅國政稱賢相

南唐周宗字君太秣陵人常給使烈祖左右用贊禪功遷樞密使將相奉法循理以司徒致仕周兵初起而宗卒二女皆為國后

陸昭符南唐金陵人為常州刺史州當吳越之衝城邑荒殘治以寬簡招納流亡遂致富實顯德五年元宗稱藩於周命昭符為進奏使及宋太祖受禪後後主嗣位如天子禮太祖怒召昭符詰之色甚厲昭符徐以鄙語對太祖笑解卒於邸



宋陳承昭昇州人建隆初入朝以承昭知水利督治惠民五丈二河通漕運又督諸軍鑿池朱明門內外以習水戰從征太原歸遷龍武軍統制

刁衍字元賓昇州人從李煜歸宋知桐廬縣會詔羣臣言事衍上諫刑書通判湖州疏陳五事歷知廬潁湖州授兵部郎中卒以純澹夷雅稱士大夫多推重之子湛湜渭湛子繹約皆第進士約直史館嘗使契丹知揚州秦義字致堯江寧人太祖召見補殿直督廣濟漕太宗時提點淮南茶鹽討捕荆湖羣盜歷典州郡義好爲詩喜賓客歷貨財之任十五年精勤練習所在稱職

盧鑑字正臣金陵人累舉進士不第仕邊職在鄜延路

敗走李繼遷又焚其積聚多斬首級又善於料敵爲利州都監奏李繼遷聲言石隕之詐宜益爲備遷知儀州州有封勝關最險要繼遷揚言欲襲取之詔徙老弱芻粟於內地鑑曰此奸謀也且示虜弱搖民心竟不徙賊亦不至知利州歲饑便宜發粟賑饑知環州平磨媚族累遷至西上閣門使知秦州

李琮字獻甫江寧人登進士第調寧國軍推官州積穀腐敗轉運使移州散於民俾至秋償新者守將行之琮曰穀不可食強與民責而償之將何以堪持不下乃止知陽武縣役法初行琮區畫盡理旁近民願視以爲則徽宗時歷知潞州潞有謀亂者爲書期日揭道上部使

者檄索奸甚亟琮置不問以是日置酒高會訖無他終  
寶文閣待制

王綸字德言建康人登紹興五年進士第歷諸王宮大  
小學正言孔門弟子及後世諸儒有功斯文者皆得從  
祀先聖宜以其式頒諸郡縣以薦爲監察御史與秦檜  
論事忤其意罷去檜死召爲起居舍人兼權禮部侍郎  
試中書舍人高宗親政詔命填委多綸所草嘗使金充  
稱謝使金主發數問綸條對金主不能屈明年知建康  
府兼行宮畱守每以守禦利害驛聞上多從之卒贈左  
光祿大夫謚章敏

俞棗字祇若江寧人崇寧四年以上舍賜進士第擢中

書舍人進給事中上言學校必使士有成才人無異論  
然後爲得言頗見行拜御史中丞陳士風六弊發戶部  
尚書劉炳陰事時蔡京方倚炳爲腹心戾其意改棗翰  
林學士竟以毀紹聖法貶常州團練副使復改官知江  
寧府卒

李可六合人咸淳間爲監察御史與御史陳過論賈似  
道黨俱貶斥朝論快之  
魏良臣字道弼溧水人初第進士卽訟陳東寃除壽昌  
令遷吏部員外郎高宗召對稱旨稱其可屬大事後拜  
叅知政事請出衣冠之囚歸蠻瘴之窟整頓軍政觀聽

一新

劉應炎溧水人介直剛方居臺諫不避權貴因忤賈似道棄官歸

**明**周貞字文典江寧人吳元年爲大理寺卿詔同李善長劉基陶安定律令貞上疏曰立法貴簡易使人易曉若條緒繁多或一事而兩端可輕可重吏得夤緣爲奸則所以禁殘暴者反以賊良善非良法也上嘉納之洪武元年陞刑部尚書出爲廣東行省叅知政事能吏悉上其績聘名儒以待考試二年復召爲尚書致仕

孔克仁句容人由行省都事進郎中侍帷幄最久太祖論天下形勢及前代興亡事必以克仁備顧問洪武二年命授諸王經功臣子弟亦令入學終叅議人

端木復初字以善溧水人太祖召爲徽州府經歷覈田均稅一除欺弊除磨勘司丞凡錢粟刑法貨物無所不讞勾稽隱伏人不能欺官至刑部尚書子孝文翰林待詔孝思翰林侍書兄弟先後使朝鮮以清節爲遠人所服立雙清館以旌之

趙本字居仁溧水人洪武中以薦辟歷官左通政其孫往省之給錢二貫令徒步歸永樂間治水浙江築堤捍海患潮汐冲擊本爲文請於海神潮果三日弗至功乃成

丁璿上元人永樂甲申進士選庶吉士改御史巡按徐州擒賊首衛輝盜起承命往治稱旨陞右僉都御史時

麓川蠻叛乘傳往視上用兵便宜十餘事勅巡撫雲南以征麓川功陞左副都御史兼巡貴州所至有政聲徐承宗中山王曾孫襲爵魏國公英宗時守備南京號令嚴肅宗族家衆罔敢撓法居十六年人未嘗見其坐立傾倚喜怒橫發時以爲有大臣體

張瑄字廷璽江浦人正統壬戌進士授刑部主事知吉安府俗健訟日不下數十百人決斷如流丙子大饑發廩賑濟不俟奏報成化初擢廣東布政平廣西流賊莫文章等建倉六十二修陂塘圩岸四千六百增築城十二任滿軍民相率乞留詔可其奏壬辰陞福建巡撫山海寇攻劫鎮城久不獲瑄至皆成擒奏革鎮守太監移

鎮河南改運倉於彰德水次以便軍民入覲奏時務一十八事皆施行晉南刑部尚書致仕卒

顧儼字廷望家金陵正統中以經明行修薦任嘉興訓導登甲科授陝西道御史清理福建軍政沙汀民叛領兵抵其境擒首惡餘黨悉平陞廣東僉事新會陽江有賊數萬提兵直擣其巢斬獲無算總戎上其功賜銀幣以勞疾乞歸

沈琮字廷器江寧人正統戊辰進士以御史出爲四川僉事時松潘地近蜀數嘯聚爲肘腋憂朝議以琮在蜀久威望素著擢副使往鎮之期月遂下黑虎諸寨松潘平璽書褒美里居人稱長者子九思嘉靖癸酉鄉舉孝

而有義行孫鳳翔進士官給事中  
鄭禮字中夫江寧人景泰中鄉薦任襄陽通判有平寇  
功擢守南安郡苦水患以便宜發倉賑之事聞朝廷亦  
不之罪

朱貞字惟正旌手衛籍天順丁丑進士知鄧州釐草驛  
弊襄盜起貞用諸生有幹局者分主供餉民以不擾進  
四川叅議督松潘儲地故險遠輸者多侵牟貞勤以率  
之弊盡革長於撫馭境內桴鼓不鳴

王徽字尚文應天人天順庚戌進士授南給事中憲宗  
卽位率同列上五事最後禁近之臣宜遵舊制使無他  
與其言尤備時閹宦牛玉謫至南京疏其大罪四乞置

諸法因斥指執政謫普安州判官興學諭俗其習稍變  
始有舉於鄉者弘治初薦起陝西左叅議致仕

盧雍字廷佐江寧人天順丁丑進士爲武庫司主事都  
御史王竑北討奉勅調兵河南簡閱精銳申明軍約悍  
帥皆奉命王竑爲大司馬戎務必與之商權諸營事爲  
之綜理出叅議福建諭政和浦城盜皆散去復捕賊酋  
二十餘人誅之一方以寧官終湖廣布政居父喪結廬  
墓側左右忽產五色芝二十本詔旌其門  
翟瑄字廷瑞南太醫院籍與弟瑛並有才名瑄舉天順  
甲申進士知奉化有善政擢御史巡撫山西有平賊功  
晉左都御史尋陞刑部尚書瑛成化丙戌進士選庶吉

士改禮科給事中封事數十規切時政上嘉納之歷大常卿以病乞歸瑛事兄甚恭時稱二翟

倪岳字舜咨尚書謙子天順甲申進士授編修成弘間

歷遷禮部侍郎定徽號冠婚祧祫及奉慈殿禮文制度

晉尚書疏請開言路寬賦役慎刑罰革淫祠禁齋醮止

胡僧却貢獅經術醇正議論詳明轉吏部尚書獎恬抑

躁銓叙惟允卒謚文敏

黃肅字敬夫六合人成化戊戌進士累官至廣西按察

僉事部內土官妻謀立其假子肅倡義立其侄土官黃

紹反討平之思恩知府岑濬謀作亂肅墮其所築丹良

城岑不得逞晉湖廣兵備副使正德初以軍功陞三品

壽八十六卒

王敞字漢英錦衣衛籍成化辛丑進士授刑科給事中

出閣四川諸鎮邊儲還上便宜六事其一言建昌礦夫

事革尚為權家所占請罷之孝宗時使朝鮮國王出女

樂燕之不聽其君臣相顧愧嘆歷轉通政使陞兵部尚

書以平寧夏功加太子太保山東及四川盜起請增設

兵備所用諸將及總制大臣皆一時之選寇平乞休歸

吳彥華字汝和江寧人成化辛丑進士歷戶部郎出守

荊州州多水患築堤三十餘里戶口歲增田畝加闢擢

四川叅政開瞿塘三峽古道入得陸行無風波患事聞

劉瑾以功不由己黜歸瑾誅復官浙江布政使

魯昂字廷瞻江寧人成化丁未進士授兵科給事中時  
判院劉文泰誣奏太宰王恕出執政意舉朝莫敢訟言  
昂獨摘發其奸天下快之太監李廣駙馬都尉齊世恩  
奪民田下昂勘問悉還之民轉戶科都給事疏文武大  
臣不法事忌者益衆爲太僕少卿楊瑛所誣下獄鞫訊  
無驗謫蒲圻令投檄歸尋復職致仕四川益州府知府  
倪阜字東岡岳之弟成化丁未進士選庶吉士授都水  
司主事陞郎中轉山東分守叅政時郡邑多盜阜計擒  
首惡餘黨悉降改守東兗檄遣勘地竭力區畫民賴以  
安陞四川布政卒  
徐完字用美江寧人成化丙戌進士授監察御史親老

乞就養南都時都御史不法完抗疏劾免之百僚憚焉  
會湖廣讞大辟囚數十人完覆訊止坐五人餘悉駁免  
仕至江西按察僉事  
陳鋼字堅遠應天人成化乙酉舉人授黔陽知縣鋼性  
豈弟通大體均定徭役招復流移與孝弟禮義之教沅  
湘二江合流城下數決壞民居鋼募民採石甃堤亘千  
丈水乃不溢縣南三里厓路甚狹諸軍戍苦之鋼焚山  
淬石拓路丈餘外繚以索行者不害民立祠祀之  
嚴紘字仲周江浦人弘治壬戌進士知歸安縣擢陝西  
道御史疏劾逆瑾出守南昌陞九江兵備偕王守仁討  
宸濠有功歷江西左布政歸是時縣民困於欽騎馬坍

江稅衛人困於月銀絃白當事悉祛其弊  
邵清字士廉江寧人端潔好學弘治壬子舉於鄉授江  
西德化教諭聘典山東試薦授監察御史教職擢臺臣  
自清始正德初戚晚張延齡恃恩奏人負券若干緡有  
旨與追清曰御史朝廷耳目之官可爲人索私債耶奉  
勅理鹽法兼管河道有勞績逆瑾索清賄不入矯旨捕  
撈之瑾誅復御史遷廣西兵備乞休  
王弘字叔毅廣洋衛人弘治癸丑進士授行人擢南道  
御史論列逆瑾罪狀廷杖爲民瑾誅起廣東副使嘉靖  
初議大禮弘不附名時論黜之  
劉麟字元瑞南京廣洋衛人有文名弘治丙辰進士臺

諫龐津等以劾外戚張氏驕橫下詔獄麟上疏申救清  
議重之授刑部主事正德初出守紹興劉瑾以麟除官  
不謂謝黜爲民瑾敗起知西安叅政時遣貴臣督兵餉  
擬加賦麟獨不可曰靖邊本以衛民可先困乎議遂阻  
軍興亦不乏累遷工部尚書奏裁工部上供十四事罷  
遣中官督造於蘇松璫憾之勒令致仕家居三十餘年  
卒諡清惠

羅鳳字子文上元人弘治丙辰進士官南道御史出守  
兗州正德中屬車屢動傳言將有事泰山東撫欲額外  
征取以備巡幸鳳不應被劾改守鎮遠復忤巡方再移  
石阡致仕



姚隆字原學上元人弘治壬戌進士由新昌令歷陞荊州守州大水人附高阜大樹日夜嗷嗷隆命駕千艘濟之以米活者數千人遠來趁食者於近境爲粥啖之活者不可勝計時取佛中官過郡從者殺人隆捕治抵罪中官恐以奇禍不爲動罷歸民肖像祀之

李熙字師文上元人弘治丙辰進士授將樂知縣擢御史論駕帖之害上納之正德時逆瑾擅政熙偕仝官疏列其奸廷杖落職歸嘉靖初起饒州知府轉浙江副使以清操著

梁材字大用上元人弘治己未進士授德清令進刑部主事改山東道御史出知杭州府值歲饑發粟以賑五日皆徧尋進按察使會宸濠變起浙鎮守中人畢真爲內應材草檄調官又自往說真撤兵衛奸謀遂沮嘉靖初歷廣東布政使不二載至戶部尚書材感恩益盡職值帝勤政力祛宿弊每言必從後以忤權倖致仕帝念材廉勤召復故官命兼掌刑部讞疑獄俱得其情上喜曰得尚書十二人如材者朕可無憂矣卒諡端肅

王暉字克明句容人正德丁丑進士授吉安推官從王守仁征宸濠請禁兵毋妄殺活數萬人晉大理寺副嘉靖初以爭大禮下獄廷杖後歷江西巡撫入爲戶部侍郎總督漕運盡除夙弊綱運如期免海州馬課裁揚州二閘人尤以爲便晉尚書倉場穀率雜泥沙鑿以磚石

爲永利有戚畹以賂請莊田峻却之予告歸  
王以旂字士招江寧人正德辛未進士由知縣擢御史  
巡按河南會宸濠叛鎮守闡劉璟傳上親征道出汴取  
藏銀四萬備供應以旂執不予巡按福建漳泉盜起率  
兵勦之月餘平以終養歸復起督北畿學歷兵部侍郎  
督治徐呂洪以通漕運復汶上寧陽間水櫃之沒於勢  
豪者以資蓄洩晉尚書總督三邊敗山丹莊浪寇破番  
賊出没境上者修綏慶城堡四千五百餘所築蘭州邊  
墻二百餘里在鎮六年卒諡襄敏  
李重字元任上元人正德辛未進士授戶部主事督賦  
兩浙鎮守太監劉璟侵官銀二十萬欲厚遺重以緘口

重曰與其遺我孰若爲民償所負以足國璟憚其嚴盡  
以所侵輸官由是兩浙宿負完百三十餘萬轉員外郎  
擢守德安宗藩羣校不法者悉寘如法不少貸爲所搆  
鐫職歸尋起工部郎中守九江進江西副使

顧璫字英玉上元人璫弟正德甲戌進士歷官河南副  
使與部使者論事有不可輒封還移文同官駭愕璫曰  
朝廷置外臺爲耳目枉法媚人吾不爲也竟以是罷兄  
璫通賓客多雅遊璫獨區其樓曰寒松教授自給

劉璽字廷守南京龍驤衛人正德間世襲指揮同知掌  
諸衛漕糧江彬以勢索運船之利力却之以薦擢叅將  
協同督運持廉甚苦時以青菜劉稱之世宗時督漕總

兵官缺所司以璽名上帝曰是窮劉也卽任之奏疏濬  
江南河道折兌山縣糧米凡上三十餘疏爲漕政良規  
何鉞字勳伯江寧人正德辛未進士授行人奉使楚藩  
固辭餽贈以廉介著擢浙江道御史武廟欲毀城中二  
坊爲演武所鉞諫止之力救建言下獄御史張仕隆等  
得末減出按兩浙終常德知府

韓邦憲字子成高淳人嘉靖乙未進士授屯田主事晉  
員外郎丁艱歸里居佐有司立丈田法題蠲賦外浮稅  
米八百餘石邦人歌之遷守衢州有惠政民建常懷祠  
祀之

沈越字中南江寧人嘉靖壬辰進士知羅田縣令民墾

汙萊地千餘畝流庸附籍者數百戶移平江羅田立祠  
祀之擢御史巡按江西執法峻整以風刀稱查覈武員  
冗濫旗役冒替者數千人疏請落職罷役嚴嵩意有所  
不悅授越指使劾之越不從左遷開州判稍遷德安同  
知告歸杜門撰述意致簡遠子朝陽爲池州教授著通  
鑑紀事前編嘉隆間見記

廖文光字士龍上元人嘉靖丁酉舉人授清江令政尚  
廉明時嚴嵩執政光擒其橫僕置之法轉廣信同知有  
商被盜幾死若有神呼之曰告廖某商隨投告果獲盜  
抵罪民益信服晉戶部員外陞都水郎罷歸

張鐸畱守衛籍嘉靖辛丑進士改庶吉士授監察御史

按遼規度要害建諸臺堡積粟六萬餘斛貯預備倉以防兵荒後十年遭大水疫癘繼作賴以賑濟人謳思之余光江寧人嘉靖壬辰進士擢御史巡按廣東時世宗以安南莫登庸久不貢將致討光上疏極諫言黎氏抗中國爲亂魁今失國或天假手登庸以報之也臣已遣官責其修貢兵部咎光輕率奪俸又以忤嚴嵩削籍伊敏生字子蒙上元人嘉靖中爲御史嚴嵩與郭勛相結爲奸敏生劾嵩所居宅乃勛私人孫灑所居灑籍沒嵩宅應在籍中帝怒奪敏生俸後官至山東叅政張祥字元吉錦衣衛籍嘉靖辛丑進士初令鄆陵豪右戢迹桴鼓不鳴入爲工部虞衡却暮夜金商人大戶不得營私陞萊州守亡命匿諸島者特出剽掠祥設法禁咸帖然受約束移楚雄郡饒礦井之利秋毫無染土官二姓爭印以理決之無敢譁遷苑馬寺卿

朱潤身字海峯江寧人嘉靖壬戌進士授戶部考功遷雲南僉事土寇鳳繼祖執張僉事以叛潤身與巡按御史用間謀募死士指示方畧繼祖授首以被謗左遷告歸

朱衣字正伯錦衣衛籍嘉靖甲子舉於鄉授臨淄令調房縣有官堰爲豪強所據衣理之鑿石築堤灌田千餘頃邑人改名曰朱公堤遷守沅州治礦徒之亂下令執鐵者賊空拳者民不得妄誅乃戮其首惡餘悉貫之守

兵以缺餉鼓譟衣日迫於饑耳先與定期給餉而眾皆定  
梁楹字汝直江寧人嘉靖丙午舉人仕至荆府長史初  
令鹿邑遷守眉州玻璃江勢暴悍善徒侵嚙城址楹用  
宋魏文靖墓頤堰記之說截江築堤百八十丈導使中  
流城乃不危至今賴之

王可大字元簡上元人嘉靖癸丑進士初授刑曹時相  
欲陷人重辟可大執不可出補瓊州海剛峯稱其止飲  
一杯水轉台州知府與總兵戚繼光禦倭俘獲甚眾世  
稱廉能吏曾孫萬禩少封股愈親疾博學能詩善書  
焦瑞字伯賢旗守衛籍以貢授靈山令時一條編法已

行邑以僻遠里甲之供如故瑞首罷之地多叢菁羣盜  
嘯聚其中推官劉某徃勦被執瑞亟率兵徃援賊驚拜  
呼父母遂救推官還訓練丁壯用銀爲射的中輒賞之  
諸兵競勸賊不敢近邑有牛稅沿爲縣用瑞一無所取  
姚汝循字叙卿江寧人嘉靖丙辰進士知杞縣擢南刑  
部主事出守大名郡故土城當河流之衝汝循始甃以  
磚石抵勢家子於法以謗左遷歸起桂陽同知遷嘉定  
州又以忤張居正罷留心鄉里利弊著有丁糧議  
黃尚質字宗商水軍左衛人嘉靖戊午舉人授劍州學  
正典試陝西攝巴縣妖寇蔡百貫作亂竭力捍禦郡賴  
以安改峽江令驛有羨金歲暮輸縣尚質令存以減明

年額派訪練子寧遺嗣於廝養爲立祠買田俾主其祀  
仕至饒州別駕子應登字徵甫以明經授教諭端廉愛  
士歸賣文養親有孝行  
司馬泰字魯瞻江寧人嘉靖癸未進士授湖南御史按  
湖廣嘗疏論給事中陳沈太監崔文置於理憲度肅然  
又陳留都軍民利害七事稱切要出知懷慶嘉興濟南  
皆有惠政勘魯府訐奏事十日而決特詔獎之  
鄭宣化字行義嘉靖乙丑進士授袁州推官陞南工部  
主事權關蕪湖力除奸蠹再遷武選司郎中一清軍官  
襲替夤緣詐冒之弊時相出片紙以錦衣某弁掌衛事  
宣化執不可遂出爲邵武守

吳自新字伯恒江寧人隆慶戊辰進士授都水主事擢  
守杭州杭俗汰侈以廉約鎮之勾檢織府金歲省數千  
遷兵備副使歷左右布政皆在浙勞心疆事歷年既久  
凡民間風尚吏治臧否毫不可欺屬邑晏然擢河南巡  
撫宗藩驕橫自新選其俊彥爲宗學長皆斤斤奉法陞  
南刑部侍郎卒

顧國輔字惟德上元人萬曆甲戌進士爲刑部郎讞囚  
有所矜釋張居正當國不允抱牘爭之居正無以奪出  
守襄陽會久旱便宜賑濟中州流民就食者數萬多方  
活之且資給遣歸晉浙江副使繩諸將之毫而貪者調  
守寶慶卒

江寧通志 卷三十一  
張後甲字丁也江寧人萬曆丁丑進士授辰州推官有諸生以事忤豪右文致傳獄亟釋之奸民有手斃其女而誣人大辟者爲白其寃陞戶部郎中督御馬草場監權清源司餉雲中餉政修舉邊計賴焉晉四川按察使時川東有征播之役客兵所過驛騷後甲以檄論之人啣枚而過民不知有兵

何棟如字子極江寧人萬曆戊戌進士授襄陽推官值苗亂遣將立縛之遂以知兵名中官檄開青山礦棟如以顯陵發脉地繪圖疏奏事得寢璫橫襄陽收其爪牙投諸江璫復開穀城宜城礦與官民爭闕棟如治其黨惡上怒逮下獄放還光宗初起南職方加太僕卿行邊


贊畫又以失貴人意遣戍後赦歸

常信字國寶興武衛籍嘉靖末以書學校士信爲舉首以印局使晉撫州府照磨時花園港有巨盜嘯聚撫按委信覘之信詭爲日者服采入其阻圖上地形并所爲芟除建置策甚具於是擒盜魁十有三人以幹局稱臨汝間

卜履吉字訥齋江寧人萬曆戊戌進士授泉州司理稅監開礦壞民廬墓履吉具疏以聞先禁黨惡璫燄稍衰因與衆約以千金助其礦稅使亟出境累官至福建兵備副使閩人立祠祀之

姚履素字允初上元人萬曆辛丑進士歷陞廣東副使

兼督學政為海瑞請蔭平抱繇羅峒黎賊乞休歸時鄉  
 民治門總甲名坊廂籍差累甚苦商之巡撫丁汝夔分  
 三則權房號以寬民力桑梓德之  
 程國祥字我旋上元人起家寒素受知於焦太史茲第  
 萬曆甲辰進士知確山縣調光山聽斷明決歷陞考功  
 郎中掌計典公慎不阿為羣小所嫉上為黜言者有清  
 望素著之褒累遷南總督倉場侍郎勤於其職倉務皆  
 親莅焉晉禮部尚書拜東閣大學士尋致仕國祥歷任  
 卿相布蔬不異諸生時步行里巷間一蒼頭自隨而已  
 身沒之後妻子冬日猶葛帔也  
 賈必選字徙南上元人萬曆己酉舉人戶部主事筦西



新倉時巨璫總部務其黨分伺六倉必選清正盡黜陋  
 規璫不得逞疏辨倪嘉慶之寃謫外陞南工部虞衡司  
 以外艱歸卽不出  
 孔貞時字中甫句容人萬曆癸丑進士選庶吉士授檢  
 討起居注與弟貞運編纂六曹章奏有足兵足餉諸議  
 時皆服其精當光宗熹宗相繼卽位一時詔令表冊諡  
 議之文政府多委之貞時以積勞成疾卒子尚豫能文  
 章熟當世之務著有詒書堂類稿  
 蔡屏周號二白萬曆乙卯舉人授浮梁令時江省為魏  
 璫建生祠撫軍檄使至浮梁屏周毀裂其移文幾及禍  
 陞開封府通判練鄉兵勦寇有功後以兵部職方行邊



出守雲中  
沈向字德一萬曆乙卯舉人任巫山令時流賊圍城月餘向率衆堅守賊引去擢御史巡漕向本衛籍夙知漕弊列十八款揭通衢衛弁懾服

孫拱辰字子極六合人萬曆乙卯舉人授撫州推官丈量樂安田地清釐隱占不阿權要移守臨清時稅璫煽惡惑方士言嚮嬰兒爲藥餌辰揭治其罪歲大祲設法賑濟全活甚衆爲山東循良第一子國敕以貢授中書孔貞運字開仲貞時弟萬曆己未廷試第二人授編修與兄並列詞館崇正初歷國子監祭酒幸太學賜坐爨倫堂進講尚書詳明剴切條上監規六事遷南禮部右

侍郎釐舊典毀淫祠疏請清刑簡政轉左侍郎名爲北吏部左侍郎九年進禮部尚書兼文淵閣大學士首疏請清言路峻廉恥破方隅止搜括優旨褒納加太子太保致仕

韓一光字季孚高淳人由進士授行人奉詔冊封謝絕餽遺擢河南道御史伉直有聲御書其名於屏巡按四川力禁投獻嚴革鋪役按邛州之獄開釋諸生數十人歷陞山東副使告歸  
常延齡字喬若開平王十四世孫襲侯封遇事敢言前後陳利病凡十餘疏皆切中時弊科臣姜埰行人熊應霖以劾首輔下獄延齡疏請釋二臣而以文彥博救唐

介為輔臣勸朝論躋之  
倪嘉慶字雋之江寧人天啓壬戌進士官戶曹時議減  
驛站嘉慶執奏謂遊手強悍之徒不為兵不為盜者皆  
賴此以存活裁之適足為患樞部楊嗣昌以增兵請加  
餉嘉慶曰今日之患不在兵少而在餉多餉多則農病  
農病則民貧民貧則鋌而走險者益眾不若簡練士卒  
減餉裕民以消盜源嗣昌銜之被誣繫獄七年既釋臺  
省交薦起戶科給事中

王芝瑞字鍾淑京衛人明季由進士授行人轉禮部郎  
有郡藩當降授將軍行賄請襲王封芝瑞却之政府為  
之言終不可真人張某留京恩給居第因求魏瑞故宅

芝瑞曰宅故賜額以待有功張某何功哉格不與時相  
將補芝瑞銓部力辭出為四川提學僉事歸  
吳嘉貞字源長江浦人明季以進士授戶部郎筦通州  
倉議捐舊逋一千一百三十萬有奇開復降革守令千  
餘人大農疏上皆得請陞泉州叅議釋誣繫革私稅境  
多盜撫勦並用遷粵西以病歸

國朝李敬字聖一六合人祖雲鶴有隱德嘗還遺金有以逋  
糧鬻女者代完逋以全其女父在公丙辰武進士有材  
畧敬中順治丁亥進士授行人考選廣西道御史多所  
建白出按湖廣請免租稅改折黃絹犒師必身至行間  
征賊有功歷陞刑部侍郎



胥庭清字永公上元人順治丁亥進士知餘姚縣時餘  
寇未靖庭清單騎入山撫之四境以寧擢工部主事權  
龍江關盡却羨餘家居兄弟子姓百口共爨時稱其孝  
友

蔡祖庚字小白上元人順治己丑進士授甘泉令以政  
最陞戶部郎歷守太原真定二府遷河南副使補任廣  
西居官以息事寧人為務尤留意人才  
徐必遠字致公江寧人順治己丑進士授祕書院檢討  
疏陳聖學淵源又請譯大學衍義進講奉

旨

俞允出為河南副使管河道性敏決持策多出人上每秋冬  
開濬修築其所衆初不喻既而卒賴以無敗事守職公

廉嚴於估計調發歲費省而工力完固遷分守桂平道  
以奏銷案被株累左遷遂歸子時成舉人時盛選貢  
湯聘江寧人順治辛丑進士知平山縣招撫流庸清丈  
板荒田請於上官蠲其賦判決疑獄民驚為神大旱步  
禱林山中以暍致疾卒

江南通志卷一百三十九終

江南通志卷一百四十

人物志

宦績二 蘇州一府

蘇州府

漢朱買臣字翁子吳人家貧好讀書嘗刈薪樵賣以給食  
 隨上計吏至長安邑子嚴助方貴幸薦之召見說春秋  
 楚辭武帝甚悅之拜中大夫時東越數反覆拜買臣會稽  
 太守到郡治樓船備糧食水戰具與橫海將軍韓說  
 等俱擊破東越有功徵入為主爵都尉子山拊官至右  
 扶風

三國顧邵字孝則吳人丞相雍子少與舅陸績齊名孫權

江南通志

卷一百四十

人物志

宦績

一

蘇州府

妻以兄女爲豫章太守舉善以教風化大行平日留心下士世稱知人子譚字子默赤烏中爲左節度每省簿書未嘗下籌屈指心計盡發疑謬代薛綜爲選曹尙書及祖父雍卒數月代雍平尙書事具與薛綜同張溫字慧恕吳人父允以輕財重士名顯州郡爲孫權東曹掾卒溫少修節操權問公卿曰溫當今誰比顧雍曰溫今無輩徵拜議郎選曹尙書以輔義中郎將使蜀蜀甚貴其才權嫌溫聲名大盛以引暨艷事斥還本郡卒溫二弟祇白亦有才名

**晉**吾彥字士則吳人出自寒微有文武才初以小將事陸抗抗奇其勇畧擢用之遷建平太守時王濬將伐吳造船於蜀彥覺之輒爲鐵鎖橫斷江路晉師攻之不能克乃退舍禮之吳亡始歸晉爲交州刺史二十餘年威恩

宣著南州寧靖

顧榮字彥先吳人雍孫宜都太守裕子榮弱冠仕吳吳平與陸機兄弟同入洛時號三俊歷官成都王穎從事中郎避亂還吳值陳敏反假榮右將軍丹陽內史榮起兵攻敏敏率萬餘人出榮以羽扇揮之皆潰元帝鎮江東以榮爲軍司加散騎常侍禮遇甚重謀畫皆諮焉卒諡曰元

顧和字君孝榮族子幼有清操王導嘗謂和曰卿不獨東南之美實爲海內之俊導爲揚州請爲別駕累遷中

丞僕射居任多所獻納雖權臣不苟阿撓拜尚書令卒  
諡曰穆

南北朝宋顧覲之字偉仁吳人令山陰理繁以約縣用無  
事歷湘州刺史善於涖民治甚有績累官吏部尚書出  
爲吳郡太守時戴法興權傾人主覲之未嘗降意心迹  
清全嘗以其意命弟子愿著定命論泰始三年加左將  
軍散騎常侍復爲湘州刺史卒諡曰簡子

陸徽字休猷吳人爲建康令清平無私除廣州刺史士  
庶愛詠歷都督寧益二州諸軍事益州刺史威惠兼著  
卒於官家無餘財文帝惜之諡曰簡子

張裕字茂度吳人初爲何無忌參軍累遷揚州別駕武  
帝伐劉毅關洛皆居守留任州事出爲廣州刺史綏靜  
百越嶺外安之元嘉中除會稽太守職事甚理尋卒官  
諡恭子子演鏡永辯岱俱知名時謂之張氏五龍

張邵字茂宗裕弟歷太尉參軍武帝以邵勤練憂公補  
揚州主簿邵悉心政事精力絕人以佐命功封臨沮伯  
除湘州刺史轉雍州至襄陽築圍立堰創田數千頃公  
私充給後爲吳興太守卒諡曰簡

張暢字少微邵兄郎中令禕子孝武鎮彭城暢爲長史  
元嘉中魏太武南侵江夏王義恭統諸軍出鎮彭城魏  
師已逼義恭欲棄鎮南歸僚佐或議欲直趨歷城或欲  
席卷奔鬱洲自海道還都惟暢力持不可輕動孝武曰

張長史言不可易也義恭乃止暢登城與魏尚書李孝伯往復千言吐屬如流音韻詳雅風儀華潤魏人相視歎息魏師攻彭城南門暢躬自前戰身先士卒魏太武遂北還歷侍中會稽太守卒諡曰宣

顧琛字弘璋和曾孫謹確不尚浮華孝建初爲吳郡太守以起義功封永新侯竟陵王誕據廣陵遣陸延稔齋書授琛及二子寶素寶先官琛執延稔斬之遣二子送其首世祖嘉之終員外常侍中散大夫

齊張岱字景山裕少子州辟從事歷三府諮議與典籤主帥其事事舉而情得嘗言我爲政端平待物以禮悔吝之事無由而及元徽中爲益州刺史數年益土安其政

遷侍中吏部尚書齊武帝時爲吳興太守更以寬恕著名卒諡貞子

顧憲之字士思覬之孫性清直宋元徽中爲建康令甚得人和都下飲旨酒輒稱爲顧建康謂其清且醇也仕齊爲衡陽內史刺史王奐嘆曰顧衡陽之化至矣若九郡率然吾將何事永元初爲豫章太守憲之雖累經宰郡資無儋石及歸環堵不免飢寒

陸慧曉字叔明吳人清介正立齊武帝爲子廬陵王擇天下第一人爲行事乃使慧曉爲長史行南豫州事帝問何以輔持廬陵慧曉以靜儉對凡歷輔五政治身清肅遇僚佐必以禮終南兖州刺史三子任僚倖並有美

名時謂之三陸

梁陸杲字明霞徽孫少好學與舅張融齊名梁天監中位御史中丞婁直無所顧望嘗以公事彈領軍將軍張穆杲從舅也出爲義興太守以寬惠稱卒諡簡子

張充字延符吳人國子祭酒緒子仕齊歷義興太守爲政清靜入梁爲吏部尚書居選以平允稱終吳郡太守諡穆子

唐陸元方字希仲吳人陳黃門侍郎琛曾孫舉八科皆中武后時累官鸞臺侍郎同平章事嘗以薦引親黨免官令白衣領職元方薦人如初曰舉臣所知不暇問仇黨尋復相元方素清慎后每進退羣臣必先訪問外秘莫

知臨終悉焚其奏稿

陸象先元方子舉制科高第景雲中歷遷中書侍郎同中書門下性恬靜寡欲議論高簡爲時所推不附太平公主元宗曰歲寒然後知松栢之後凋罷爲劍南按察使爲政尙仁恕卒諡文貞始象先名景初睿宗曰子能紹先德是謂象賢者乃賜名弟景倩景融景倩爲扶溝丞按察使覆州縣殿最以景倩爲真清終監察御史景融亦知名

歸崇敬字正禮吳人擢明經遭父喪以孝聞天寶中舉博通墳典科第一歷主客員外郎代宗幸陝召問得失極陳生民疲敝當以儉化天下大曆中奉使新羅及還



囊橐惟衾衣海外傳其清德後以兵部尚書致仕卒諡  
曰宣

歸登字冲之崇敬子事繼母篤孝舉孝廉又策賢良貞  
元初爲右拾遺裴延齡得幸右補闕熊執易疏論之以  
示登登曰願竄吾名雷霆之下君難獨處何列有所諫  
正輒聯署無所回諱憲宗問政所先登知帝睿而果於  
斷勸順納諫諍內外傳爲讜言累遷工部尚書卒諡曰  
憲子融字章之開成初拜御史中丞湖南觀察使盧周  
仁違詔進羨錢鉅萬融劾之請以所進代貧民租終兵  
部尚書

陸瓌字仲采吳人太子詹事餘慶子舉明經仕以清幹  
稱歷洛陽令摧勒姦豪人不敢犯累遷西河太守從子  
長源字泳之有清譽貞元中由汝州刺史徙宣武行軍  
司馬去汝日送車二乘曰吾祖罷魏州有車一乘而圖  
書半之吾愧不及先人云

顧少連字夷仲吳人父望有隱德少連擢第後又舉書  
判拔萃德宗朝累遷翰林學士中書舍人以謹密稱歷  
吏部侍郎嫉裴延齡之姦嘗與會飲挺笏欲擊之會解  
而止改京兆尹政尚寬簡遷吏部尚書徙兵部東都留  
守表禁苑及汝州閑田募耕以便民卒諡曰敬  
沈傳師字子言吳人禮部員外郎旣濟子貞元末舉進  
士累拜尚書右丞湖南江西觀察使徙宣州傳師吏治

嚴明人不敢罔所莅以廉靜聞入爲吏部侍郎太和初卒性冲粹無競更二鎮無書賄入權家及歿鬻宅以葬子詢字誠之咸通中歷昭義節度使政尚簡易人皆便安

陸亘字景山吳人元和初策制科中第補萬年丞累遷太常少卿歷充蔡虢蘇四州刺史浙東觀察使徙宣歙巨文明嚴重所至以善政稱

宋謝濤字濟之其先富陽人父崇禮爲中吳軍節度推官始家於蘇濤祥符八年登第爲梓州判官李順反成都擢太常博士歷侍御史知雜事清靜端介終太子賓客

鄭戩字天休吳人天聖二年進士以右正言知制誥詞深雅知開封府政有能迹歷拜樞密副使出知杭州浚治西湖民賴其利代范仲淹爲陝西四路都總管兼經畧安撫招討使夏人懾服累遷奉國軍節度使卒諡文肅孫時舉進士改秩知當塗縣以寬厚稱

葉清臣字道卿長洲人天聖三年舉進士甲科景祐中直史館京師地震疏請詳延忠直敢言之士由是以言獲譴范仲淹余靖等皆得遷徙出爲兩浙運使疏水利民歷知永興軍浚三白渠溉田踰六千頃以侍讀學士知河陽卒清臣爲人爽邁遇事敢言數陳世務皆可施行

范師道字貫之吳人叅知政事仲淹從子父琪字希世以進士仕至郎官師道舉天聖甲科擢侍御史累遷三司副史直龍圖閣知福州明州居官厲風操有聞卽言請罷內降恩澤又言諸閣多遷擢恐內寵因緣以害政又請士大夫終葬始得從仕擇知典故近臣以任禮樂之官凡奏議二十卷皆經國大務嘗爲唐詩史著君臣治忽之迹藏之秘閣子世京世亮皆進士世京居父喪以孝聞以著作郎知海鹽縣終祕書丞

程師孟字公闢吳人祐初舉進士甲科累遷提點夔路刑獄歲凶以常平粟賑民不足卽矯發他儲不俟報全活四十餘萬歷知楚遂洪福廣越青州爲政簡而嚴

發隱摘伏如神所部肅然

徐師閔字聖徒其先建安人父奭官蘇遂爲郡人熙寧末自司農少卿出知袁州修武備嚴號令劇賊詹遇不敢犯境爲治鎮靜有惠愛吏民生爲立祠子鑄字元鈞年少入官有能名所至課嘗居最政和初提舉兩浙常平修松江石隄闢常熟水田歷知杭廣揚三州

范純禮字彝叟仲淹第三子以父蔭爲祕書省正字元祐中累遷給事中凡所封駁正名分紀綱皆國體之大者徽宗立知開封府丞前尹深刻之後一切以寬濟之歷拜尙書右丞疏言今朝廷議論之臣皆是元豐而非元祐豈恤國事直以快私憤而售其奸不可不察純禮

沉毅剛正以左朝議大夫奉祠卒紹興初追諡忠獻  
范純粹字德孺純禮弟以蔭歷京東轉運使盡革前使  
吳居厚苛政時蘇軾自登州召還純粹與同建募役之  
議軾服其精詳復代兄純仁知慶州修明戰守救援舊  
制及夏人侵涇原純粹遣將疾馳赴援擊退其軍入爲  
戶部侍郎以徽猷閣待制致仕卒純粹沉毅有幹畧爲  
帥恩威兼用邊人畏服

鄭景平字希尹郡人熙寧三年與父伸同登第爲人剛  
正不詭隨莅官有廉聲請老後復起知饒州未久卽歸  
時朱勔用事士大夫多俛節從之獨景平終始不見  
李彌遜字似之吳人父撰字子約以進士仕至朝議大

夫介特有守彌遜登第累遷起居郎以封事剴切謫官  
靖康二年以江東運判平建康牙校周德之亂紹興中  
復爲起居郎論事如初試戶部侍郎秦檜主和議彌遜  
切諫檜以政府虛員動之爭愈力乞歸卒朝廷思其忠  
節詔復敷文閣待制

李彌大字似矩彌遜弟崇寧中登第靖康初自刑部尚  
書詔除河東宣撫副使俄罷知陝州河東偏將李彥仙  
來謁彌大壯之留戍殺澠間以過敵後彥仙果奏捷於  
陝彌大尋率衆赴大元帥府紹興中歷官工部尚書  
葉夢得字少蘊吳人少嗜學登進士第累官翰林學士  
知穎昌府李彥括公田以黥吏告許籍舞陽民田數千

頃夢得上其事捕吏治之民大悅紹興八年除江東安撫制置大使金兵至拓臯夢得據守江津使不得渡而去兼總四路漕計給諸大將餉軍用既足皆力戰退敵移福建安撫使殄平海寇拜崇信軍節度使致仕卒徐林字稚山蘇人少有特操中進士第與王黼有連不肯附麗紹興中以趙鼎薦歷太府少卿忤秦檜出爲江西轉運副使又以劾檜親黨謫居興化隆興初爲吏部侍郎以論事不合奉祠歸湯思退薦爲給事中累辭不赴終龍圖閣學士子葦字子禮舉進士乾道初知江陰軍興水利有治績歷官提舉浙東常平王葆字彥光崑山人弱冠通諸經舉宣和六年進士紹

興中累遷考功御史秦檜專政百司莫敢可否事葆獨伸滯直枉當官不避出知廣德軍移守漢瀘二州皆著政績歷浙東提刑可祠歸葆學行深醇尤精鑒裁每賞識士於未遇時後多爲名臣

范成大字致能吳人登紹興進士弟乾道中官禮部員外郎兼崇政殿說書以文學材氣爲上所知及奉使金國力正受書之禮詞氣慷慨不辱命上知其忠勁益有意大用除中書舍人奏繳張說除簽書之命累遷叅知政事卒諡文穆成大歷鎮靜江成都建康興利除害去思遺愛所在歌舞爲文瞻麗清逸尤工於詩胡元質字長文長洲人父珣以行義著元質舉進士光

宗時歷遷給事中嘗論人主言動不可不謹至累百言  
帝書之座右恩眷特厚紹熙中除四川制置使知成都  
奏減蜀鹽虛額錢五萬餘貫又奏沿邊諸州軍事皆切  
中要害卒諡獻惠

黃由字子由長洲人淳熙八年廷對論內侍甘昇與曾  
覲王抃相結招權納賄擢第一吳自設科來由始冠多  
士累遷將作監嘉王府贊讀紹熙五年孝宗疾光宗不  
能問安人情疑懼由請嘉王過重華宮問安孝宗爲之  
感動慶元初有請斥僞學之黨者由執奏不可終刑部  
尚書

衛涇字清叔崑山人淳熙十一年舉進士第一累遷著

作郎紹熙二年正月震雷電大雪繼作涇言皆陰勝陽  
之證意指李后及諸佞倖慶元間論壽皇孝養禮曠宜  
積誠意以得太上歡心嘗請誅韓侂胄論罷陳自强歷  
拜叅知政事卒諡文節涇歷事三朝出入內外憂國忘  
家始終如一

冷世光字賓王常熟人與弟世修世南同入太學時稱  
三冷舉紹興進士淳熙中歷遷殿中侍御史條奏忠切  
彈劾無所避人謂之冷面御史世修字良器與兄同登  
第仕至朝奉大夫

王介字元石郡人由進士授昭慶軍簽判光宗時入爲  
學官疏請駕觀重華宮寧宗卽位韓侂胄用御筆罷諫

官介力攻之開禧中為尙書度支郎首陳用兵之禍後累遷中書舍人會不雨請冊免宰相史彌遠歷知慶元府卒諡忠簡介初學於呂祖謙故文學有原委子桢字子文工詩書效歐陽詢以父蔭補官復登第歷僉書樞密院事以不阿丁大全罷歸

麋溧字子長蘇人左司郎中師旦子以父郊恩授如臯尉復舉慶元進士嘉定末累遷監察御史理宗卽位除右正言立朝剛正先後封事彈章數十上人稱其有仁者之勇大臣之節以祕閣修撰致仕子彝字伯升由進士歷知安慶府彝字仲昭以蔭官提舉江西常平並有治績

李韶字元善彌遜曾孫父文饒台州司理叅軍多陰德韶嘉定中與兄寧同舉進士累遷右正言疏請起魏了翁以台輔再疏劾內侍陳洵益女冠吳知古帝怒韶還笏乞歸不獲復乞外由起居舍人出知漳州號稱廉平嘉熙間召赴闕論事復數十上擢翰林學士奉祠歸卒韶平粹簡淡門無雜賓

元干文傳字壽道吳人登延祐進士乙科授同知昌國州事州居海島民多頑犷文傳柔以恩信俗為大變歷遷烏程長洲縣尹婺源吳江知州皆有善政擢集賢待制與修宋史供職勤恪三史成以禮部尙書致仕

明滕德懋字思勉吳縣人元季辟帥府叅謀討方國珍及

國珍降留撫台州台人德之太祖徵授中書行省掾歷官戶部尚書德懋才辯豪爽器量弘偉長於奏疏

盧熙字公暨崑山人兗州知府熊弟博學工書洪武初以薦授睢州同知尋行知府事御史奉詔清軍欲按舊籍勾民充伍熙止以常隸尺籍數人昇之御史怒熙曰州軍籍止此廼之民且散竟不能奪後卒官吏民挽哭者千餘于充賴有學行嘗以能書薦云  
俞貞木字有立長洲人名儒琰孫洪武初以薦知樂昌縣改都昌以禮化民清節尤著門人吳縣袁政字文理永樂中由薦授湘陰典史有政績夏原吉薦其才遷知遂安縣

呂昭字克明崑山人洪武中以薦授徐州訓導改浦城縣丞永樂中以治行遷知沁州赴任過徐天寒尚未挾纊故所授經弟子共買裘衣之子且旣舉進士昭遺書勵以清節後且仕終建昌推官亦稱廉吏時同縣有三廉宦之目謂昭及漢陽知府章廉中府都事朱顯也  
王英字俊伯崑山人洪武初由太學選授御史以身許國上特命署都御史事大書敦厚王英四字揭諸殿柱永樂初歷陝西按察使以簡靜稱又吳縣張勗字勉夫永樂丁酉舉人官御史言事激切終廣西僉事  
陳祚字永錫吳縣人永樂己丑進士官河南叅議以言事謫佃太和宣德初擢御史疏請頻御經筵講說大學



衍義或摘其語激上怒逮繫詔獄正統初復官出按湖廣歷福建僉事致仕元孫鑿字子兼嘉靖戊戌進士歷河南副使峻却屬吏魏綬轉雲南釋武定亂民之脅從者  
陳鎰字有戒吳縣人永樂壬辰進士宣德末累遷右副都御史鎮守陝西正統六年代還尋仍出鎮進右都御史十年入理院事進左都御史景泰二年陝西旱饑朝廷從陝人請復遣鎰莅鎮軍民大悅鎰寬厚清慎先後在陝十餘年陝人愛戴呼爲黑髯慈父家繪其像事之如神還朝踰年致仕卒諡僖敏裔孫太學生震有學行諸生世治工文翰並知名於時

劉璉字廷璉崑山人永樂壬辰進士洪熙初歷官叅贊宣府軍務宣德中兼督邊儲尋以戶部侍郎兼巡撫累降勅褒獎景泰初卒官璉公勤廉慎久鎮邊陲聲績甚偉

俞士悅字士朝長洲人永樂甲辰進士自湖廣副使遷浙江叅政所莅著丰采又城汴澈二浦以備倭正統己巳都城戒嚴士悅以右都御史督軍分守晝夜籌畫不釋甲冑事平進刑部尙書後謫戍赦還復官  
魚侃字希直常熟人永樂甲辰進士以刑部郎督漕清河置卒撩淺運道無滯知開封府斷決明允日進菘菜脫粟人比之包孝肅同縣錢昕正統己丑進士歷湖廣

布政清節與侃齊名  
 虞祥字仲貞崑山人永樂中舉人授金華府學訓導歷  
 兵部侍郎卒為人謹飭達大體自校官入諫垣及以大  
 臣巡視畿甸所在著聲孫臣累官四川叅議清慎有家  
 風  
 范希正字以貞吳縣人宣德三年舉賢良方正授曹縣  
 知縣為奸吏所誣坐逮曹民八百餘人詣京白希正廉  
 能被誣帝釋之使還縣正統十年山東饑惟曹以希正  
 先積粟得無患大理寺丞張驥賑山東聞之因請升曹  
 縣為州而以希正為知州從之希正治曹二十二年得  
 民最久

徐有貞字元武初名理字元玉吳縣人宣德癸丑進士  
 選庶吉士歷諭德始奏改名景泰四年河決張秋擢僉  
 都御史往治之建置水門開支河濬運河三策功成人  
 稱其才遷左副都御史天順改元以迎復功進華蓋殿  
 大學士封武功伯尋謫戍金齒後放歸卒有貞博學多  
 能詩文皆偉麗

練綱字從道長洲人祖則成為御史有聲綱領宣德乙  
 卯鄉薦正統己巳之變上中興八策以薦擢御史按淮  
 陽鹽政駙馬都尉趙輝侵利劾奏之又糾吏部尚書何  
 文淵侍郎項文曜典選不公人多其侃直有練綱口之  
 號後按福建與監司互訐謫判邠州卒

仰瞻字宗泰長洲人正統間由貢累官大理丞時王振用事百官多奔走其門獨瞻與大理卿薛瑄不往尋以辨冤獄事忤振謫戍大同振敗復起執法愈堅終大理少卿

龔理字彥文崑山人正統丙辰進士官工部郎以廉幹聞會河決張秋廷議推理佐徐有貞治之景帝曰是不要錢龔郎中乎遂擢山東左布政督河工理置八閘作九堰築大洪口甚著勞績後以疾歸行李蕭然清節益顯

顧暉字明德吳縣人進士吳子正統丙辰進士以御史理長蘆漕政盡革宿弊復按山東自監司以下諸吏有

不職者皆劾退之不少徇都御史王文以得巡方體移文諸御史當以暉爲法後平贛州長河洞巨盜

張和字節之崑山人正統己未進士授南京刑部主事歷浙江提學副使儀範肅然待諸生有恩義歿後浙士數百人賻哭哀之如父

張穆字敬之崑山人宣德乙卯舉人以兄和未預鄉薦不赴公車及正統戊午和亦舉於鄉己未同登進士授工部主事歷擢山東副使表伯夷閔損孔融狄仁傑墓訪孫復石介之後給以衣廩東土服其風化後自浙江叅政歸無以自給門人故吏爲買田松江以老焉

祝顥字惟清長洲人正統己未進士授給事中建白務

持大體景泰間歷遷山西參政時邊警屢告公私困竭  
顥規畫周密倉儲充足汾州有妖人作亂顥已馳獲十  
六人而妄扳及千人顥欲簡釋三司難之顥竟具實奏  
聞後罷歸顥吏材精敏兼工詩文

朱驥字漢房常熟人正統壬戌進士天順中官御史有  
風裁時閣臣李賢柄政尙書金濂依附之驥劾濂語并  
侵賢時人語曰朱驥手練綱口終廣西叅議

吳淳字厚伯常熟人都御史訥子正統戊辰進士擢御  
史以清謹聞子堂字子升弘治壬戌進士亦官御史抗  
論宸濠不法監陸完毛銳軍有殲流寇功

孫瓊字蘊章崑山人正統戊辰進士天順中歷刑部郎

中時錦衣門達羅織人罪法司承望風旨刑多枉濫惟  
瓊多所平反太監牛玉假子犯法屬瓊寬之瓊執法不  
少徇積爲權貴所忌謫戍遼東成化初復官致仕葉文  
莊盛嘗云鄉里作官前輩當法吳丈後輩當法蘊章吳  
丈謂吳凱也字相虞宣德中官部曹有治劇才家居四  
十年以禮自律風儀嚴峻

葉盛字與中崑山人正統乙丑進士授兵科給事中土  
木之變盛疏請先正扈從失律諸將罪及寇迫都城三  
日間章奏七上皆中機宜寇退進都給事中出安集陳  
州流民還奏畿輔旱蝗請加寬恤以才擢山西右叅政  
協贊大帥軍務復獨石等四城大興屯田擿戍卒之不

任戰者給牛種耕之軍用以給天順二年巡撫兩廣屢破賊砦移鎮宣府修復屯堡七百餘所邊塞益寧人爲吏部左侍郎卒諡文莊

章格字韶鳳常熟人父珪字孟瑞正統中官御史有直聲格舉景泰辛未進士歷廣東按察副使巡視海道時琉球使臣以貨轉販他境遭風漂至香山守臣欲盡戮之以爲功格爲奏辯還其資而遣之遷雲南按察使撫綏得宜邊徼畏服終大理寺卿弟律字鳴鳳由進士歷廣西布政平荔浦獞賊終南副都御史

陸昶字孟昭常熟人工詩文景泰辛未進士歷福建叅政先通番商船肆掠海上莫能捕治昶練兵發艦迹其所在悉擒戮之海濱獲安其他築隄防實倉庾除宿蠹具有方畧閩人德之

盛景字允高吳江人景泰辛未進士授御史清山東馬政奏蠲被災逋賦復按廣東單騎諭降瀧水諸賊後以言事謫古田典史遷知羅江縣教民鑿池一千二百餘所自是旱不爲害終叙州知府

程宗字文伊常熟人景泰辛未進士知吉安府吉安素多舞文奸胥宗手自裁牒書之奸無所容累擢副都御史巡撫陝西率兵擊退洮川西番潘松諸寇又奉璽書宣諭木邦孟密爭地仇殺二酋皆俯聽約束而西南無事詔褒其績以南工部尚書致仕

尤淳字公厚長洲人叅議安禮孫景泰癸酉舉人知鉛山縣調永年雪冤獄以廉慎稱淨慧寺僧戕人惑衆捕置之法燔其寺後以抗直去官子懋字宗陽正德戊辰進士歷太僕卿人稱其才守族人錫類字孝徵萬曆庚辰進士知真定府著廉直聲後預平播功終雲南布政劉瀚字約之長洲人天順丁丑進士歷大理知府鋤強綏弱民安其政卽遷按察使精法比持憲體尋致仕歸同縣張翥字汝振與瀚同登第知南昌府理冤獄捕大猾折服中貴之乘傳橫索者仕亦終滇臬

陳易字一元常熟人天順壬午舉人除建昌推官雪平民爲盜誣引者五十餘人遷黃州府同知冢宰王恕知其清節將峻擢之以母老乞歸

李傑字世賢常熟人成化丙戌進士入翰林累官禮部尙書高簡自重爲正論所歸上邊務六條時稱碩畫以忤劉瑾致仕爲文清醇有法卒諡文安

胡琮字文德長洲人成化丙戌進士知江陵遼王不檢束其下多剽掠爲民患琮一繩以法始皆斂戢以最擢御史坐言事謫常德同知有大璫自滇還過郡恣索金錢琮引伍伯出聲言欲檢視其橐璫懼卽行後乞致仕歸

顧福字天錫吳縣人成化丙戌進士歷刑部員外郎勘獄浙江摘發鉅贓尋以忤勢要出通判永州請罷牙茶

香草之徵累遷河南參政分司南陽宗藩軍校多不戢福以禮裁斷皆帖然無怨福友於兄弟卹其鄉黨人無間言

徐恪字公肅常熟人成化丙戌進士授工科給事中彈劾無所避歷遷右副都御史巡撫河南恪素剛正所至抑豪猾祛奸弊及爲巡撫以所部多王府持法尤嚴調撫湖廣吏民罷市泣送數十里不絕屬吏以羨金贖峻却之終南工部右侍郎

瞿俊字世用常熟人成化己丑進士除崇仁知縣以最擢御史出按江西刺舉不避權要尤嚴懲墨吏遷廣西按察副使正己率下人多悚服

王鼎字元勳常熟人成化己丑進士授南刑部主事有京衛指揮抵重法賂尙書求移獄鼎執不從歷湖廣叅議杖殺大猾裁藩府預借祿米遷廣東叅政尤著清勁聲

褚祚字昌印常熟人成化壬辰進士授臨海知縣約己裕民政爲屬邑最以薦擢御史理畿內馬政釐革宿弊歿不能殮同年吳寬爲殮之

張汝舟字濟民崑山人成化甲午舉人官南昌同知殲巨寇徐九齡時寧藩驕橫汝舟一無所徇藩妃兄爲盜捕論如法遷思南知府治以簡靜聞

吳洪字禹疇吳江人孝子璋子成化乙未進士官刑曹

能斷疑獄出巡視廣東海道以清節著歷工部左侍郎時劉瑾用事誣劉大夏罪欲殺之洪力辯得解遷南刑部尚書以執法忤瑾勒令致仕子山巖崑

吳瑞字德徵崑山人成化乙未進士歷工部郎中督理河道鑿甃社湖左腹河四十餘里得免風濤之險以疾乞歸瑞素邃易學尤長古文詞子蘭弘治己未進士官

御史

徐源字仲山長洲人成化乙未進士歷兵部郎絕權貴請託核正冒濫武功爵弘治中巡撫山東歲饑奏行賑濟割臨清倉米八萬餘石抵漕額明年將徵償源奏民賴賑稍蘇而又遽徵與不賑何異詔悉蠲之後致仕歸

卒源詩文博雅兼工書法有米氏風

吳愈字惟謙崑山人成化乙未進士知叙州府平馬湖土司亂歷河南參政清藩府侵占屯田

陳瑀字玉汝長洲人成化戊戌進士由庶吉士改兵科給事中論奸僧繼曉罪置之法又封事屢上人咸謂得諫垣體歷大理少卿獄多平反屢遷南左副都御史兼管操江致仕歸卒

劉纓字與清吳縣人成化戊戌進士歷知武陵縣擢御史出按廣東正豪猾誣陷罪及誅武弁之以捕盜肆虐者尋以劾外戚忤旨孝宗杖而釋之累擢右僉都御史再撫四川徧巡邊境調度精明威震諸番後以刑部



尚書致仕

沈林字材美長洲人成化辛丑進士知晉州有異績遷守順慶治行爲諸郡甲以雲南參政入賀忤劉瑾落職尋復起歷副都御史巡撫貴州平鎮筩銅仁烏羅諸叛苗改撫山東以疾致仕

馮玘字良玉常熟人成化辛丑進士除泌陽知縣捕豪猾撫流民以政最擢御史出按貴州疏請勦平都勻叛獠又按浙江治鎮守中貴不法事終福建副使

盛洪字思禹崑山人成化甲辰進士歷海道副使捕斬海賊嚴禁通番堅却市舶中官之餽擢山東按察使卒沈杰長洲人成化甲辰進士知歸德州州當黃河衝杰

築長堤開白柳等河河水由之入淮民免墊溺歷知衢州府大興水利修復堤閘民得灌溉而城中絕水患終河南布政

蔡昂字惟中長洲人通經學尤精法律成化甲辰以諸生貢入南雍尋歷南大理寺有盜發牛首山麓秦檜墓捕得法司議寘大辟昂獨建議檜罪通於天今墓被盜發殆天降之罰耳請從末減寺卿躋之昂由此知名以明法除九江府推官多雪冤獄

馮琨字君夫崑山人成化丙午舉人弘治中官薊州知州以清覈牧地草場事忤勲貴誣奏下獄孝宗閱其辨疏特詔復官正德初劉瑾復以前事逮繫琨久乃得釋

終登州知府

毛埕字貞伯吳縣人成化丁未進士授南工科給事中  
劾巨璫薄琮罪論死鎮廣安遠侯柳景誣構廣撫秦紘  
埕又劾之紘釋而景罷歷南太僕卿宸濠反大司馬喬  
宇採埕議委督泗潁和陽諸軍爲江表聲援進右副都  
御史致仕元孫堪字公輿萬曆戊戌進士官御史出按  
雲南疏爭貢金加額事又劾鎮臣驕橫仕至通政使  
張瑋字嘉玉蘇州衛人成化丁未進士授工部主事分  
權杭州嚴察奸蠹課贏而不以羨進進郎中督漕河徐  
州興革必盡民利不爲勢撓中貴過其地皆斂戢爲劉  
瑾所陷謫戍遼陽瑾敗釋歸瑋居官素廉晚歲益貧至

晨夕不能自給及卒郡邑爲賻禭鄉人斂資葬之

葉紳字廷縉吳江人成化丁未進士歷禮科給事中弘  
治十年紳請太子早出閣擇講官諭教尋以修省陳八  
事復專劾中官李廣八大罪未久廣竟得罪紳擢尙寶  
少卿卒

王哲字思德吳江人弘治庚戌進士授御史歷按福建  
廣東江西所至清軍伍理鹽務平劇賊卹民隱作士氣  
又劾江西鎮守董讓不法事上切責讓自是中官少戢  
後以僉都御史巡撫江西宸濠憚之旋爲所毒乞歸卒  
從孫有功字可大萬曆癸未進士由遂昌知縣擢御史  
有清節贈光祿少卿

張琮字廷獻吳縣人弘治庚戌進士自禮部郎中出爲陝西叅議劉瑾銜之謫濟寧知州甫一月擢御史出撫甘肅時寘鍤初平人情未定琮廣布恩威邊陲以寧遷湖廣副使白蓮僞教嘯聚千餘琮俘戮渠魁而貸其餘襄地安堵累擢右副都御史巡撫湖廣平德安襄陽芒部諸妖逆終南京右副都御史或士對論或論或論盧翊字鳳翀常熟人弘治庚戌進士歷御史出按四川兼視水利鑿都江堰連歲大熟撫降天全六番招討司遷副使守禦松潘更定戍法禁戍長苛歛修鐵索橋及葺治棧閣以通道行者便之士人名盧崖閣進雲南參政建策築堡於姚安界中擇將屯守以絕生熟彝之入

寇又洱海地素苦旱爲開陂儲水築壩障泉而田得灌溉人食其利以薦擢廣西布政卒

毛澄字憲清崑山人弘治癸丑廷對第一授修撰正德中歷遷禮部尙書屢進讜言世宗由興邸卽位以澄迎立功加官蔭堅辭不受大禮議起澄力持尊無二統之議帝不從澄苦爭不得遂引疾歸卒諡文簡澄歷事三朝論事侃直不少媵阿有古大臣風節同縣張羽由進士官刑部郎以議大禮忤旨廷杖削籍

吳一鵬字南夫長洲人弘治癸丑進士選庶吉士歷侍講忤劉瑾出爲南京部曹瑾誅復故官嘉靖初累拜禮部左侍郎力爭大禮疏論興獻帝不當建廟京師又力

糾給事中陳洸附會議禮之罪俱不從後以南吏部尙書致仕卒諡文端

盛應期字斯徵吳江人弘治癸丑進士授工部主事忤太監李廣遂搆以罪謫安寧驛丞累遷雲南僉事以裁抑鎮守太監梁裕為所劾逮繫詔獄尋得釋歷右副都御史巡撫四川江西進督兩廣所莅皆著威惠屢奏平賊功既引疾歸里以河決徐沛特起右都御史往治之應期建議開昭陽湖東百四十餘里為永久計興役垂成為言者所阻而罷

楊昇字起同吳縣人弘治癸丑進士選庶吉士改戶科給事中有大臣以罪斥復資緣再進昇疏劾之人憚其勁補禮科覈視遼陽邊儲斥不法數人邊塞肅清子伊志嘉靖丙辰進士累官右副都御史巡撫南贛亦著聲績

朱希周字懋忠崑山人父文官御史有直聲希周舉弘治丙辰廷試第一人授修撰遷侍讀以忤劉瑾左遷歷禮部侍郎嘉靖初大禮議起希周力持讜論風節挺特累官南京吏部尙書以考察忤權貴乞致仕家居益廉靜自持卒諡恭靖

顧潛字孔昭崑山人弘治丙辰進士選庶吉士改御史屢論時政皆見採納又劾光祿少卿祝祥阿附外戚太常卿崔志端左道惑人皆斥去武宗卽位疏言嗣服之

始當崇敬畏戒佚欲任耆碩遠佞倖時論偉之出督京畿學政為劉瑾黨所構罷歸

周倫字伯明崑山人弘治己未進士白新安知縣擢御

史正德中勘太監李興伐禁林山木事上嘉其直以忤

劉瑾斥歸瑾誅復起出按山西奏築太原南關新城寧

武關上堡塚口濠塹邊境永賴嘉靖中累遷南京刑部

尚書卒諡康僖子鳳鳴字于岐正德戊辰進士歷刑兵

二部郎中以吏幹稱終大理寺丞

周用字行之吳江人弘治壬戌進士正德初官南兵科

給事中極諫以中旨斥廷臣且請治鎮守江西中官罪

時多其直出為廣東叅議預平番禺盜有功嘉靖中歷

南刑部尚書致仕用端亮有節槩人惜其去以薦起工

部尚書督河道尋改漕運未上召拜左都御史遷吏部

尚書卒諡恭肅

陳察字原習常熟人弘治壬戌進士正德初由南昌推

官擢南御史尋改北劉瑾既誅武宗猶日狎羣小察偕

同官極諫出按雲南嘉靖初復按四川先後請罷鎮守

中貴又伸救諫臣楊言直聲震朝野歷僉都御史撫南

贛旋以忤旨斥歸弟寰舉進士仕至祭酒正德中以直

諫奪俸

陸鰲字鎮卿吳江人弘治壬戌進士授荊州府推官廉

勤明允諸郡多疑獄上官檄鰲往決之擢御史巡山海

關疏籌邊三事悉見採納復按河南奪宣武等衛田爲勢家所占者六千餘頃給諸貧軍歲增糧四萬石終浙江參政

顧鼎臣字九和崑山人弘治乙丑廷試第一授修撰嘉靖初以直講受眷歷吏部左侍郎請授曾子後五經博士比三氏子孫從之進禮部尚書京師淫雨四方多水災鼎臣請賑饑弭盜報可尋以本官兼文淵閣大學士卒謚文康鼎臣官侍從時屢陳東南賦役不均之弊世宗特勅撫臣釐定之倡築崑山城後有倭警邑賴以全鄉人立祠祀之孫謙服天啟中由貢除昌化知縣治以嚴辦聞

吳山字靜之吳江人尚書洪子正德戊辰進士官刑部郎中抗直不撓權勢力諫武廟南巡忤旨廷跪五日屢遷河南巡撫劾伊王府宦豎及臨漳王府將軍之爲民害者左遷浙江參議後歷撫四川南贛並著聲績終刑部尚書弟巖同榜進士授給事中乾清宮災疏陳數十事語皆切直仕至四川參政山子邦貞嘉靖癸丑進士官湖廣按察有撫討土司功終太僕卿曾孫易字日生明季癸未進士以名節著

方鳳字時鳴崑山人正德戊辰與兄鵬同舉進士官御史武宗時屢諫巡幸江西副使胡世寧以忤宸濠被逮力救之薦王守仁當不次用世宗初大禮議起鳳力

持正論以兄附張桂之議因并劾之旋自劾以謝兄遂免歸初鳳鵬素友愛及鳳罷鵬亦以太常卿告歸兄弟雍睦無間

陳迥字良會常熟人正德丁丑進士嘉靖初官御史同官以直諫逮訊迥抗疏申救下獄廷杖謫合浦主簿累官河南副使帝幸承天坐供具不辦落職後頻薦不起孫國華字珍凡萬曆甲戌進士知東平州擒劇盜決疑獄終廣州知府

沈漢字宗海吳江人父奎有孝行漢舉正德辛巳進士授刑科給事中論中官馬俊王堂罪嘉靖改元詔蠲逋稅漢以民間已納者多飽吏橐請已徵未解者作來年

正課又與獻帝議加皇號疏陳不可霍韜欲改官制力陳其謬及張寅獄起執法大臣多得罪漢抗章申救廷杖削籍隆慶初贈太常少卿

王同祖字繩武崑山人正德辛巳進士選庶吉士授編修嘉靖中以議興獻廟制被斥用薦起歷司業九廟災上言宗廟宜藏主石室引公羊傳及漢儀為証人服其博識子逢年字舜華高才嗜古能世其學

朱觀字顥伯崑山人嘉靖癸未進士官御史言事忤旨廷杖巡按陝西奏築花馬池至橫城堡邊墻百六十餘里永為西陲利終河南布政

顧夢圭字武祥崑山人御史潛子嘉靖癸未進士官南



吏部郎應詔陳言論六事尤論中官鎮守之害得旨撤  
還擢廣東參議乞止海北採珠之役參政福建平連江  
壽寧松溪諸寇終江西布政子允默有文名同縣陸冕  
字子端夢圭同榜進士授禮部主事以劾方士陶仲文  
廷杖謫浮梁驛丞後歷陝西副使

陸燦字子餘長洲人嘉靖丙戌進士選庶吉士改工科  
給事中勁挺敢言時張璁桂萼擅政燦劾其罪帝悟立  
斥之尋復用霍韜言召還璁萼下燦獄謫都鎮驛丞遷  
永新知縣前後獲盜數百姦猾屏迹以念母乞歸母歿  
毀甚未終喪而卒燦嗜學博通古今有著述行世  
秦鰲字子元崑山人嘉靖丙戌進士歷兵科給事中劾

魏國公徐鵬舉中官賴義不法狀彗星見劾張孚敬妬  
賢病國帝遂罷孚敬及孚敬再相汪鋐承風旨以考察  
謫鰲東陽縣丞屢遷福建參議卒

曹達字履中常熟人嘉靖己丑進士官御史以糾冢宰  
汪鋐罪忤旨廷杖謫蘄水知縣中人從章聖梓宮過境  
恣索供帳達令吏民牽板水次已公服前引中人素聞  
其剛直遽引去

周大禮字子和崑山人嘉靖壬辰進士知興化府興木  
蘭障水之役以備旱澇歷山東登萊道除海壩漁稅  
嚴訥字敏卿常熟人嘉靖辛丑進士選庶吉士歷侍讀  
三吳困倭患後歲復大稔有司徵歛益急訥疏請蠲貸



帝從之累遷禮部尚書改吏部慎選曹郎務抑奔競振淹滯又仿先朝三途並用法州縣吏政績異者破格超擢銓政一新尋拜武英殿大學士仍掌銓政以疾告歸卒諡文靖孫棻字子張明季甲戌進士除信陽知州設守嚴密寇不敢犯為督師盧象昇所重


徐申字周翰崑山人嘉靖中由鄉舉歷刑部主事張延齡繫獄申奏記尚書宜援議貴議親例請於帝以慰昭聖太后心帝震怒盡收繫前後提牢主事申廷杖謫外任不赴官而歸與同里魏校輩歎咏為樂久之卒

王賚汝字以善常熟人嘉靖中由鄉舉授增城知縣地接五嶺素多盜設方畧獲斬之歷漢陽知府瀨水淤塞出府羨金募役開濬溉田千頃名王公河

袁洪愈字抑之吳縣人嘉靖丁未進士歷禮科給事中以劾嚴嵩私人出為福建僉事屢遷湖廣參政所在以清節著書數召為南太僕少卿歷南禮部尚書改吏部引年致仕卒諡安節洪愈通籍四十餘年所居不增一椽出入徒步及歿巡撫周孔教捐金葬之

張勉學字益甫長洲人嘉靖丁未進士由翰林改給事中方士陶仲文受封爵抗疏駁之出勘邊事劾仇鸞濫殺冒功謫內黃丞累遷僉事分巡長沙平藩府租額聽縣徵解民便之分守衡永宣布恩威苗民懾服

徐棻字世寅常熟人嘉靖丁未進士自宜春知縣擢南



御史忤嚴嵩謫浙江布政司都事累遷江西參議監戚繼光軍破境內羣盜又平花園洞賊歷僉都御史巡撫浙江修築海鹽隄二十餘里以南工部尚書致仕孫復祚字陽初才名甚盛

陳贊字廷裸常熟人嘉靖丙辰進士自永豐知縣擢刑科給事中劾罷嚴嵩黨二人請錄建言廢斥者廷杖削籍隆慶元年起官吏科請卹楊最楊繼盛而誅曲殺沈鍊之楊順路楷皆報可擢太常少卿忤高拱謫官後以薦起累遷右副都御史振肅綱紀復以直言忤時相除南刑部侍郎卒諡莊靖

楊成字汝大長洲人嘉靖丙辰進士授工部主事累遷四川參政按蜀藩侵占山林陂田悉還之民進廣西左布政桂林用兵成調畫有功擢都御史巡撫江西賑災荒修水利民尸祝之入為工部侍郎歷南兵部尚書劾巨璫張鯨罪斥之子告歸卒諡莊簡

申時行字汝默吳縣人嘉靖壬戌進士第一授修撰歷吏部左侍郎萬曆六年拜東閣大學士十一年進首輔時行性平粹承前相綜覈之後一切為寬大以諧人情亦數有獻納錄建言諸臣罷內搯皆有力焉嘗力言催科急迫徵派加增刑獄繁多用度侈靡之害十九年子告歸里又二十三年卒年八十諡文定

郭諫臣字子忠長洲人嘉靖壬戌進士授袁州推官列

嚴世蕃諸不法狀上巡按御史林潤潤以入奏世蕃伏  
誅歷吏部員外郎會中官毆御史關下抗疏請正其罪  
屢擢鄖陽巡撫未任卒  
韓世能字存良長洲人隆慶戊辰進士選庶吉士授編  
修歷禮部左侍郎嘗奉使冊封朝鮮及楚藩餽遺無所  
受分校鄉會試所拔多知名士又吳縣劉瑛字玉儔隆  
慶辛未第二人及第授編修歷中允亦有清望  
趙用賢字汝師常熟人隆慶辛未進士選庶吉士授檢  
討疏論輔臣張居正奪情事廷杖削籍後起原官累遷  
吏部左侍郎初用賢以建言得譴名震一時及再起聲  
望益重為執政所忌遂不得安其位而去公論惜之卒

諡文毅

顧其志字太冲長洲人隆慶辛未進士萬曆中官陝西  
叅政時西陲告警其志有保靈武功累遷陝西布政使  
抑礦稅二璫歷左副都御史總督三邊有紅水青陽諸  
捷疏止礦稅減織造發二璫惡跡撤之改總南憲

顧九思字與睿長洲人隆慶辛未進士授豐城知縣萬  
曆初以治行擢戶科給事中歷禮兵都給事中條奏皆  
有關軍國大計咸推其讜直累遷右通政以病乞歸裔  
孫太學生希喆以學行稱三典康熙庚辰進士盛有文  
譽

沈璟字伯英吳江人漢曾孫萬曆甲戌進士歷吏部考

員外郎時有冊封鄭貴妃之旨璟疏請定國本并請  
王恭妃封號忤旨謫行人司正遷光祿丞尋乞歸卒天  
啓初贈光祿少卿弟瓚字子勺萬曆丙戌進士歷江西  
僉事以行義著鄉里  
朱熙洽字鴻甫崑山人萬曆甲戌進士授潛江知縣清  
民田築磚城歷貴州副使所至皆以清嚴著孫日燦萬  
曆壬子舉人官工部員外郎督臨清廠有守城績  
陳子潛吳江人以字行僉事俱元孫萬曆丁丑進士授  
行人選禮科給事中有清直聲降福建布政司照磨歷  
兵部郎中發武弁餽金事致之法終湖廣僉事子潛性  
篤孝母喪飲泣一日喪明

顧雲程字務遠常熟人萬曆丁丑進士授淳安知縣調  
繁嘉興皆有善政擢御史出為江西僉事九江有景德  
鎮之亂雲程撫其渠魁藍芳威後為名將歷貴州參議  
安輯容山銅仁二苗轉霸州兵備繩稅使馬堂以法終  
南太常寺卿子大章

張棟字伯任崑山人萬曆丁丑進士授新建知縣時清  
田議起棟徧歷相視定上中下三等遂為永利治以嚴  
辦聞擢工科給事中累陳時政皆得俞旨歷兵科都給  
事中以疏爭國本救言官斥歸天啓初贈太常少卿  
吳之佳字公美長洲人萬曆庚辰進士授襄陽知縣有  
善政擢兵科給事中歷刑科都給事中以謹直著時册

立久稽禮垣李獻可以豫教請上嚴謫之之佳偕同官  
抗疏力爭並削籍一時有吳中三諫之目謂之佳及張  
棟葉初春也天啓初贈之佳太僕少卿孫适字幼洪崇  
止丁丑進士歷兵科右給事中因忤權奸得罪直聲震  
一時後遭母喪以毀卒


葉初春字處元吳縣人萬曆庚辰進士授順德知縣建  
水壩以扼海寇丈量阡陌賦額一清循良為嶺表最名  
拜禮科給事中轉左以疏救同官李獻可落職天啓初  
贈光祿少卿

伍袁萃字聖起吳縣人萬曆庚辰進士歷兵部員外郎  
署職方事李成梁子求為錦衣大帥袁萃力寢之累遷

廣東海北道副使中官李敬轄珠池其參隨擅殺人袁  
萃捕論如法後致仕歸時常熟陸枝字培吾以鄉舉知  
彝陵州稅關將抵荆爪牙恣為奸利枝率州人追而沈  
之闔不敢問

申用懋字敬中吳縣人大學士時行子萬曆癸未進士  
授刑部主事歷兵部職方郎中熟悉九邊要害掌樞者  
深倚之先後歷樞曹十九年望最著天啓初累官右副  
都御史巡撫順天以忤璫罷崇正初起兵部左侍郎進  
尚書拮据城守大著勞績弟用嘉字美中萬曆壬午舉  
人歷官貴州參政

諸壽賢字延之崑山人萬曆癸未進士甫釋褐與同年




生顧允成等疏論房寰誣劾海瑞罪奪冠帶放還久之起南陽教授歷禮部主事戚里中貴干請皆拒之以疾乞歸以經學指授後進築室吳之華山纂述周易未畢而卒

袁黃字坤儀吳江人萬曆丙戌進士授寶坻知縣省重役裁苛派築堤扞海水闢曠土擢兵部職方主事時有援鮮之師黃疏請赴軍前贊畫遣奇士馮仲纓金相往說倭將約盟解甲事垂成爲閩帥所忌遂落職天啓改元追叙東征功贈尙寶司少卿黃博學尙奇尤精律呂曆法

王臨亨字止之崑山人萬曆己丑進士授西安知縣調海鹽守絜才敏讞獄如神擢刑部主事恤刑廣東故事減大辟不得過百人臨亨平反二百餘人吏執案請曰應活人耳寧計駁耶遷郎中大著明允之譽子志堅志長志慶皆知名時有一鳳三雛之目

翁憲祥字兆隆常熟人萬曆壬辰進士除鄞縣知縣以課最徵入歷吏科都給事中疏請東宮講學福王之國糾中官黃勳等不法事知縣滿朝薦等以忤稅使繫獄力請釋之遷太常少卿卒弟愈祥應祥并居官有清名憲祥子漢麟尙氣節終南安推官

金士衡字秉中長洲人父應徵雲南參政以廉能稱士衡萬曆壬辰進士南工科給事中兼掌六科事極陳礦



稅之害請撤還中使語極愷切又爭輔臣沈一貫庇被  
察給事御史擢南通政參議歷太僕少卿士衡清介敢  
言士論推重

陸化淳字君復常熟人萬曆壬辰進士授工部主事歷  
知金華府義東二邑困於開採遂定全浙補價議革守  
礦兵省費以千數復守贛州廉敏如在浙時以勤卒官  
弟化熙字羽明萬曆癸丑進士官工部出莅夏陽漕渠  
山東蓮妖驟發突犯東關化熙有禦寇護漕功終湖廣


參政

沈琬字季玉吳江人漢會孫與兄琦弟珣號沈氏三鳳  
琬舉萬曆乙未進士以母老不謁選母歿服闋始仕歷

東昌知府持守清介福藩就封中人遇臨清暴橫以琬  
約束嚴皆不敢肆遷副使歲旱蝗琬賑饑殲盜東土獲  
寧小子自南以文學有盛名由進士除蓬萊知縣清操  
肖父

繆國維字四備吳縣人萬曆辛丑進士累官貴州副使  
聞安酋難作叱馭兼程抵任枕戈坐甲者三閱月圖解  
叙功遷叅政尋告歸子慧遠順治丁亥進士有文譽孫  
錦宣康熙癸丑進士授編修品行端雅繼讓戊辰進士  
彤丁未狀元有傳

汪起鳳字無朋長洲人萬曆辛丑進士歷江西叅政分  
守南瑞弭孽宗之變遷按察使分巡嶺北贛州兵譁辱




帥圍署皆正其罪境內獲安累擢廣東布政  
徐待聘字廷珍常熟人棧從孫萬曆辛丑進士歷湖廣  
僉事分守荆南奢會驛騷繕兵庀餉楚地晏然遷陝西  
按察使撫臣喬應甲希魏忠賢意急追故侍郎王之寀  
賊鉅萬待聘故緩之與應甲抗不少屈尋引疾歸從弟  
待任字廷葵以鄉薦歷沔陽知州楚藩中涓殺人捕置  
之法民田為相國子所奪斷還之亦以強直名

葛錫璠字中恬崑山人萬曆辛丑進士歷刑部員外有  
大司馬私人受戎帥賂事露屬刑部庇之錫璠不可卒  
按以法屢擢河南分守道殲靈寶盜魁散其餘黨中州  
以安終河南按察使子鼐字端調崇正庚午舉人篤學  
嗜古家多藏書悉鏤板行世

王心一字繩甫吳縣人萬曆癸丑進士由行人選御史  
天啓初疏論客魏寵盛及救言官之攻客氏得罪者忤  
旨斥歸尋復官歷遷應天府尹又以糾閹黨削籍直言  
勁節推重一時崇正初起用終刑部侍郎

陸康稷字宇粒吳縣人萬曆丙辰進士知貴溪廬陵二  
縣有廉能聲擢兵部主事忤魏忠賢落職崇正初復官  
歷文選郎中長洲管玉音天啓乙丑進士授工部主事  
以督工節費忤璫被陷廷杖斥歸

孫朝肅字恭甫常熟人萬曆丙辰進士授刑部主事光  
宗時紅丸一案朝肅首發正論又上書規切輔臣方從





哲人多悚服出知兗州府預平蓮妖屢遷廣東布政弟朝讓由進士歷江西布政所至有循良聲

瞿式耜字起田常熟人禮部侍郎景淳孫湖廣參議汝說子舉萬曆丙辰進士授永豐知縣有惠政調江陵永豐民乞留命再任崇正初擢戶科給事中矯矯立風節所建白多當帝意搏擊權豪人皆憚之尋以錢謙益枚卜事牽連謫官復起應天府丞歷廣西巡撫

姚希孟字孟長吳縣人舉萬曆己未進士選入翰林希孟力持清議以剛直稱天啓中希孟以母喪歸旋被論削籍崇正初起左贊善時輔臣定逆案多所咨決歷遷詹事在講筵四年頗有獻納爲溫體仁所忌出掌南院

尋移疾歸卒諡文毅子宗典字文初崇正壬午舉人名行甚著孫田修字德中康熙辛酉舉人通州學正

顧宗孟字巖叟長洲人萬曆己未進士知定海縣會有調援之役定兵怒其帥婪侵鼓噪宗孟至武場諭以大義得解散擢御史遇事敢言權要側目乞養歸與文震孟姚希孟稱吳中三孟

顧錫疇字九疇崑山人萬曆己未進士改庶吉士授檢討天啓中魏忠賢勢大熾以錫疇典試福建程策中有譏刺語遂削籍崇正初召復原官歷禮部左侍郎條列用人五失五善及耗財諸弊帝善之因與楊嗣昌忤爲所構落職歸復起南京禮部左侍郎進尙書

文震孟字文起吳縣人待詔徵明曾孫弱冠舉於鄉以學行負盛名十赴會試至天啓壬戌始舉進士第一授修撰時魏忠賢漸竊柄累逐大臣震孟上疏規切時政鐫秩調外旋斥爲民崇正初召爲侍讀歷少詹事頻有建白讜直益著特拜禮部左侍郎兼東閣大學士甫兩月爲溫體仁所構而罷震孟剛方貞介有古大臣風節卒諡文肅子諸生秉字孫符有高行

顧其國字在一吳縣人天啓壬戌進士授永豐知縣靖桂苻革耗羨值歲災稷曲措糧賦民不知困以政最擢御史出巡陝西茶馬解京馬匹獨踰常額

許士柔字仲嘉常熟人天啓壬戌進士選庶吉士歷左

庶子侃直負氣節時羣小所輯三朝要典雖燬而改削光宗實錄未正士柔抗疏力爭遂與當國者忤出爲南國子祭酒尋降尙寶司丞遷少卿卒族子重熙字子洽博雅有史才

李模字子木吳縣人天啓乙丑進士授東莞知縣以政最擢御史慷慨論時事有慎獄詳刑諸疏巡按正定劾奏鎮守中官謫南京國子監典籍其後潛居著書以壽終

朱天麟字游初崑山人崇正戊辰進士授饒州推官凡攝六篆皆以廉惠得人心並建祠祀之戊寅考選以條對兵食稱旨擢編修甲申正月奉差出都中塗聞京師


陷一慟幾絕

蔣燦字韜仲長洲人父育馨由鄉榜知清流縣有惠政  
燦舉崇正戊辰進士除餘姚知縣捍禦蔡城獲全歷官  
樞曹出備兵天津作三臺為捍蔽保全南浙糧運長蘆  
鹽課歸里後遭母喪哭泣過哀兩目喪明人稱其孝  
趙士春字景之常熟人吏部侍郎用賢孫叙州知府隆  
美子崇正丁丑第三人及第授編修樞輔楊嗣昌奪情  
士春抗疏劾之末言臣祖用賢當神宗初輔臣張居正  
茂倫起復臣祖慷慨建言幾斃杖下腊其敗肉以示子  
孫臣不敢背家學而忘先訓疏入謫福建布政司檢校  
後復原官終左中允

蔣茶字畹仙常熟人崇正丁丑進士除南海知縣弭盜  
鋤奸豪猾屏跡調建安時多盜警茶濬城隍募鄉勇得  
勝兵數百屹若雄鎮撫臣舉通省廉幹第一以禮部主  
事歸里

盛王贊字子裁長洲人崇正丁丑進士授蘭溪知縣以  
清惠稱舉卓異第一以忤巡按被糾崇正素知王贊名  
嘗對輔臣稱其強項後補東陽甫七日以內艱歸遂隱  
居陽城為村塾師屋旁有田二畝卒之日囑其子曰此  
吾祖宗所遺也

國朝金之俊字彥章吳縣人萬曆己未進士授中書舍人屢  
擢兵部添註右侍郎



皇朝順治元年仍授以兵部右侍郎歷祕書院大學士加太傅康熙元年予告歸里卒謚文通之後受知

世祖恩禮優渥有清勤端慎之褒疏陳江浙白糧民運之累得

改官運民至今賴之

顧予咸字小阮長洲人順治丁亥進士授寧晉知縣畿南多盜廉其魁數人捕弗誅厚衣食之爲耳目盜悉驚散縣地多不耕上官徵賦如故力爭乃免又平賦役而豪家不得匿田以累貧弱調知浙之山陰兩舉卓異擢刑部主事歷吏部考功員外郎時當掌計遽移疾歸適郡有大獄株累逮繫昭雪後居鄉風格峻整爲後進所憚

孫魯字孝若常熟人明廣東布政朝肅子順治壬辰進士授衢州推官西安有重獄久未決魯廉察得實論如法其餘多所平反遠近翕然稱神明歷大同知府地近邊而俗樸魯興禮教設義學茲誦相聞宿習丕變

王師征吳逆調發旁午魯輓粟飛芻士獲宿飽以母老乞終

養歸

宋德宜字右之長洲人明御史學朱子順治乙未進士選庶吉士授編修屢遷左都御史請弛海禁以資濱海居民生計嚴糾大帥之馭軍無法者歷吏部尚書杜絕請托清釐銓法進文華殿大學士德宜風度端凝贊理機政尤稱慎密卒於官謚文恪子駿業字聲求康熙乙

卯副榜歷官兵部右侍郎大業字彥功康熙乙丑進士  
仕至內閣學士

徐元文字公肅崑山人順治己亥殿試第一人授修撰  
屢遷國子祭酒訓士嚴肅歷左都御史整飭紀綱澄肅  
吏治屢陳時政多見採納以事鐫秩解任復起原官洊  
陟刑戶二部尚書進文華殿大學士兼掌翰林院事輔  
臣綰院篆異數也罷歸舟過臨清權使檢視囊橐衣裝  
之外唯圖書千卷人服其清子樹本字道積康熙丁丑  
進士官編修

許定升字升年長洲人順治甲午副榜授禹城知縣決  
斷明敏俗多投繯赴井以中怨家定升覽牒立察其虛  
實受事三年止定真命兩案又捕治豪蠹不少貸治聲  
大著引疾歸里力行善事與同志積粟賑饑復倡設有  
嬰堂鄉里稱之

陸在新字蔚文長洲人康熙丙午舉人除松江教授舉  
卓異擢廬陵知縣清操特著每晨拜誦戒石四箴乃視  
事建二亭縣門榜曰問苦息事每置投牒者於中令諦  
思之多自悔求息者不息乃詳訊之曲直立判嘗裹糧  
詣鄉勗民孝悌力田藹如家人暇則與諸生講德論文  
士習益醇邑大治卒於官民罷市巷哭

吳一蜚字翼生長洲人康熙丁未進士授山西山陰知  
縣歲屢不登一蜚頻請緩征蠲賦賑粟平糶又連決疑

獄人頌爲神補洪雅縣蜀中自遭明季寇亂後征稅不及原額十一時撫臣以承平日久民稠土闢欲復賦額之舊一蜚力爭得減入爲工部主事擢御史累官刑部尚書轉吏部在職皆以廉慎稱卒於位貧無以殮藉朝士賻始克庀喪事

蔣伊字謂公常熟人明禮部主事蔡子康熙癸丑進士選庶吉士改御史有陳六部積習及請減白糧之價諸奏彈劾大吏無所撓避又集民間疾苦繪十二圖以獻

聖祖波覽嘉納出爲參議督糧廣東多所興除遷河南提學副使以實行移士習公明稱第一卒於官先是閩逆之變禁兵駐蘇城以供調遣人皆惴恐伊疏言內地不必防

禦以身家力保無他虞得撤回郡人德之

歸允肅字孝儀常熟人明刑部主事起先子康熙己未殿試第一人授修撰辛酉典試京闈所拔皆寒畯刑部尚書魏象樞昌言於朝慶其得人歷官少詹事與議政事持正不阿以疾告歸居鄉有清望

陶元淳字子師常熟人康熙戊辰進士授廣東昌化知縣作浮糧考魚鱗冊會稽經費錄區分縣事如家事爲民請命與上官往復千言動以至誠海外武弁驕橫盡發其奸狀將吏斂戢時行村落問民疾苦行不坐乘暑不張蓋以勞卒官邑人尸祝

張孝時字嘉錫吳縣人康熙辛未進士選庶吉士改欒

江南通志 卷一百一十一  
城知縣濬浚沙諸河故道延袤四十餘里列植榆柳以固隄防邑之水患遂息在官二載政績特著以巡撫薦及九卿保舉擢寧州知州撫綏疲瘠民日休息又疏濬州西天池資民灌溉連歲大稔以疾乞休未就道而卒嚴虞惇字寶成常熟人明信陽知州栻孫康熙丁丑殿試第二人授編修左遷大理寺副時通倉盜米案有欲以私怨鍛入人罪者因虞惇力持不可而止又有內務府殺人移獄事虞惇先上書本寺少卿邵觀歷指疑狀又出不意執其人訊之遂吐實獄始定累遷太僕少卿典試楚蜀皆稱得人平日淹貫經史著述俱行世  
蔣廷錫字揚孫康熙己卯舉北闈癸未

欽賜進士選庶吉士明年卽授編修才名冠史館屢擢內閣學士雍正元年遷禮部侍郎歷戶部尙書勾稽周密諸曹宿弊釐剔無遺六年進文華殿大學士仍兼理戶部事廷錫品粹才優莅事精敏仰贊機務悉協

宸衷特加太子太傅給一等阿達哈哈番世職九年七月卒於位諡文肅

蔣杲字子遵長洲人明副使燦四世孫康熙癸巳進士歷戶部郎中廉敏勤慎爲諸曹最出知廉州府寬厚持大體而剖決明銳廷無滯訟上官皆重其才守輒檄攝隣郡事所莅俱有聲以罣誤罷用薦監修海寧海神廟工垂竣而卒杲文學博瞻兼長吏事未竟其用人多惜

之

江南通志卷一百四十終



